

HLOMPOH

Ke nakoana e fetileng ha ke tloha sepatala, eaba ke e tlohela matsohong a Morena, hore ha—ha nka... ke itsebile ke batla ke chele lentsoe, hoba ke tšoeroe ke sefuba. Empa ka nahana haeba nka... hore haeba 'mè a ntlaufetse nka tla, khele, ke ne ke tla boela ke theoha ho le etela. Hobane, ha ke bona motho ea kang 'mè a robetse mono, le ho tseba bommè le bontate ba bang mona, bohole re tlameha ho fihla tulong eo, u a bona, 'me ke nahana kamoo ke lebohang haele moo a itokiselitse ho tsamaea.

² 'Me hape, ke batla ho hhalosetsa kereke taba. Kea kholoa hore ke bone Khaitseli Wilson morao mono. Ho boele—boele ho be le Khaitseli le Moena Sothmann mona nqa e 'ngoe, mohlomong, ka hara mohaho. 'Me—'me ba 'maloa ba lona mona le thusitse ka ho lula le mama bosiu, le lintho tse kang tseo, ehlile ke hona ho tsepahala. 'Me ke ananela sohle seo le se entseng bohole. Ruri, lelapa le khathetse, lea tseba, re ntse re lula letsatsi ka leng. 'Me hona joale, bongata ba bona bo sa sebetsa, ho joalo ka 'na le ka Meda, kapa—kapa Delores, 'me o na le bana sekolong, 'me re batla re thatafalloa ho e arola joalo, 'me u khathala haholo. U batla u sa khone ho tsamaea, ha u khone ho khetha motšeare ho bosiu, ho thata, haholo ha u fihla lilemong tsa ka le tsa Meda, u a tseba, ha u—ha u qete masiu a 'maloa ha u ntse u tsofala.

³ Ka baka leo, ke itse nka leta letšeare le bosiu. Ebe ke theoha ke tsoa California ka T-model Ford ea ka, ke otsele tseleng, ke qeta matsatsi a mane kapa a mahlano, mohlomong matsatsi a supileng, ho fihla. Ebe ke qhoba joalo, letšeare le bosiu. Ere ha ke khathala hanyenyane, ke lahlele kobo tlasa koloi, ke khanne ke kene makhulong, ho robala lihora tse 'maloa ke ntoo tsoella. Ke fetohile haholo ho tloha mohlang oo, Moena Neville. Ke sa tsoa elelloa hobane ke fetile lilemo tse mashome a mabeli a metso e mehlano, ua bona.

⁴ 'Me ka hona ke e—e monyetla ho ba fihla mona tlung ea Morena bosiusing bona. 'Me hoseng hona keha ke tšoere nthoana—nthoana, lintlha tse 'maloa tseo ke batlileng ho... ke tla... tseo Morena a mphileng tsona. 'Me ka hopola mohlomong hoseng hona, ha nka fumana monyetla, ke tla bua ka eona pele ke rapella bakuli. Empa ka ho tsoa morao ka baka la lipotso hoseng hona, ka hopola mohlomong, haeba mama a ntlaufetse, e ka ba sesupo sa hore nka theoha hape bosiusing bona, mohlomong, le ho bua nakoana bosiusing bona haeba ke sa sitise lenaneo la Moena Neville nq'a e 'ngoe.

⁵ 'Me eare ke sa eme ka phaposing ka fuoa bopaki bo khabane, mabapi le khaitseli ea Mokreste e nang le rōna

bosiung bona. Hoseng hona o ne a kene moleng oa thapelo, 'me a rapela, a ntse a buella motho e mong. 'Me kahara phaposi ea hae, phaposi e fifalitsoeng, ho hlonngoe *E—E Selallo Sa Morena, Selallo Sa Morena Sa Ho Qetela.* 'Me letsatsi le ke ke la chabela phaposi ka nqa efe. 'Me ka hora ea boraro thapama ena, sona Selikalikoe sena sa Leseli se neng se bonoe mona mohla re qetang ho rera Mengoaha ea Kereke, le mpa le batla le tšoana le mookoli ka 'mala, hoo, ea ka le lula holima hlooho ea Morena Jesu. Be, a Le shebella nakoana. Eaba o tloha ho ea bolella khaitseli ea hae, ha ke utloisia pale, 'me—'me ba tla ba Le makalla nako e telele, hora kapa ho hong. 'Me eaba ba bitsa moahisane, moreri, eèna e le Moena Stricker ka mona, ho tla bona semaka sa Lona. Eaba ba lula ba Le shebella, ho fihlela ea bohlano kapa ho hong. Eaba moreri o kotjoa ho rapela, a ikutloa feela a sa khone ho rapela, kapa ho hong.

⁶ Nakoaneng, motho a ntša molaetsa, ('me ba ntse ba o koaholla), eaba molaetsa o khutla, ka puo ea moalets, ha thoe ba o "tolokile ka phoso," ha ba o koaholla ka nèpo. Ke kholoa e nèpile, ha se eona, Khaitseli Bruce? Ha ba o koaholla ka nèpo. Ha boleloa lebaka la pontšo, e ne e le ho ba bontša, ho supa kananelo ho bona, ka ho lumela Molaetsa o tsoang tabernakeleng mona, ka tsela eo. 'Me ha thoe ba tla bona ho hlaha lintho tse kholo ho feta tsena, ba tla bona Mangeloi a nyolohang, 'me a theoha a bile a nyoloha.

⁷ Ka baka leo re phela matsatsing a qetelo, 'me re atametse nako ea bofelo. 'Me ke... Taba ena ekare, eka utluoa e tšabeha bathong ba bang, empa ho Bakreste, ke thabile ha re le mona. Ke—ke thabetse ha re fihlile bofelong.

⁸ Ke buile joalo kopanong ka mohla o mong. 'Me motho ea buang le 'na, a re, "U re'ng? U re u ka thabela ho bona lefatše le fela?"

Ka re, "Oh, e, monghali!" Ka re, "Ehlile bo!"

⁹ Ha thoe, "Be, ekare ha e etse kelello, motho ea ka batlang bofelo ba lefatše ho fihla."

¹⁰ Ka re, "Mohla bofelo ba lefatše, mohlang oo, Jesu o tla fihla, 'me Ke Eèna eo ke batlang ho mo bona." 'Me ka re, "Bibele e rialo, 'Bohle ba ratang ho hlaha ha Hae!' Ua bona?"

¹¹ 'Me ke thabo ho tseba seo, hore lintho tsena tsa khale mona, tsa bophelo, li tla khaotsa ka le leng la matsatsi ana, 'me re tla—re tla Mo bona.

¹² Empa hase khale, ho kile ha boleloa tlase koana ho... Oh, lilemo tse ngata tse fetileng, mehleng ea makhoba. 'Me leqheku la monna e—e motšo la... le ne le tloaetse ho bina lifela tsa khale tsa kereke, lifela tsa mahaeng. Ba ne ba kopana ba rerela makhoba, ba rere, u a tseba, ebe ba tšoara kopano. Eaba bosiu bo bong ho pholosoa thaka le leng. 'Me hoba a pholosoe, a

itseba e le monna ea lokolohileng. Ka hona a qala a bolella makhoba a mang, hoseng ho hlahlamang, tšimong ea bona ea lifate, a re, “Ke lokolohile.”

¹³ Eaba mong’ a hae o tla a mo hulela kahare, a re, “Joale, sheba mona, Sam.” Ha thoe, “Seo ke se utloang ho thoe u ntse u se joetsa makhoba ke sefe, u re u lokolohile?”

¹⁴ A re, “E, mong’ame.” Ho re, “Hoo ho nepile.” Ho re, “Kopanong ea maobane bosiu, ke lokolotsoe molaong oa sebe le lefu.” Ke eona. Ke eona.

¹⁵ Molao oa sebe le lefu, ke lokolotsoe ho ona. U kile ua tloangoa mono, u a bona, empa joale u lokolotsoe mono. Ua bona? Joalokaha ke boletse hoseng hona, lefu le ahile sebeng feela. Sebe le lefu lia tšoana, ua bona. Empa ha u tlohile sebeng, u tlohile lefung; empa ha u ntse u le sebeng, u kahara lefu. Ua bona? ’Me ha u lokolohile molaong oa sebe le oa lefu, u ‘mopuo a mocha ka ho Kreste Jesu, ’me u lokolohile ke hona.

¹⁶ ’Me mong’ a hae a re ho eèna, ho re, “Sam, na u hlile u tiisitse ka taba eo?”

¹⁷ A re, “E, monghali.” Le ho re, “Maobane bosiu Morena o mpitsitse ho bua le batho beso, le ho qoqa le bona, ho re ba ka lokolloa molaong oa sebe le lefu. Leha re le makhoba, koana re ka lokolloa molaong oa sebe le lefu.”

A re, “Sam, na u hlile u tiisitse ka taba eo?”

¹⁸ A re, “Mong’ame, ha ke tsebe u tla nketsang hoba ke u bolelle taba ena, empa ke—ke a u bolella, ’na ke monna ea lokolohileng.” A re, “Ke lokolohile moalong oa sebe le lefu.”

¹⁹ ’Me a re, “Sam, ke Mokreste, le ’na, u a tseba. ’Me ka hobane u . . . Molimo a u lokolotse sebeng le lefung, me u le Mokreste, me u ikutloa u batla ho boella banabeno ka eona, ke tlil’o theoha hoseng hona ke u lokolle, ke tla tekena phatlalatso. ’Me u ka ba monna ea lokolohileng, u sa tlangoa ke mang kapa mang, ho bolella banabeno Evangel.”

²⁰ O boletse mothaka eo oa khale a rerile lilemo tse ngata, ngata. ’Me ka mohla o mong, hamorao, joaloka röna bohle, re fihla qetellong ea tsela ea röna. ’Me ha re fihla qetellong ea tsela ea röna . . . tsela ea hae, hoba a etse hoo, a theoha a fihla ke hona. ’Me a robetse a ilibane, ba rialo, nkare, oh, lihora tse ’maloa. ’Me metsoalle ea hae e mengata e mesoeu ea mo etela. ’Me eitse ha a phaphama sehlopha sa bona se le kahara moaho, a iphumana. A qamaka, a re, “Le re ha ke eso fihle mono le joale?”

’Me ba re, “Sam, esale u khaleha.”

²¹ A re, “Che.” A re, “Ke ne ke sa khaleha.” Ho re, “Ke ne ke tšeletse mose oane.”

²² Khele, ba rialo, baena ba bareri ba re, “Sam, re bolelle u boneng mose oane.”

²³ Ho re, “Be,” a re, “ke ile ka kena khorong e tšoeu e kholo ea perela,” le ho re, “eitseha ke kena ka mono,” ho re, “ka bona Terone, eaba ke bona Eèna.” Le ho re, “Eaba ho nyoloha Lengeloi, La re, ‘Na ke uena Sam?’”

A re, “Ke eèna.”

²⁴ Ha thoe, “Sam,” ha thoe, “e—e kobo le moqhaka ke tsena.” Ha thoe, “U hapile sena, Sam, ka mesebetsi e meholo eo u e entseng lefatšeng.”

²⁵ A re, “Lesa ho bua le ’na ka moputso oa kobo le oa moqhaka.”

A re, “U batla moputso oa eng?”

Ho re, “Ntumelle ho Mo talima lilemo tse sekete feela.”

²⁶ Ke kholoa bohle le röna re ikutloa joalo, ha re joalo? Ha ke—ke batle likobo le meqhaka le lipaleisi tsa letho, ke rata ho Mo talima feela. Ke rata feela ho Mo talima. ’Me feela, u a tseba, na u ke ke ua rata—nka rata ho tšoara letsoho la hao ha ke etsa joalo, Moena Neville. Re ka e etsa ’moho, ho re, “Ako nahane, Moena Neville, kamoo re kileng ra lula tabernakeleng, mocheso le serame, le lintho. Empa sheba seo re se talimileng mona, Mora oa Molimo o phelang.” Na ho ke ke ha babatseha, ho sheba le ho talima litšobotsi tsa Hae!

²⁷ ’Na, ke habeli bophelong ba ka joale, hararo, ke Mo bone ponong. O a tšoana ka linako tsohle. Empa lefatšeng ha ho setaki se ka takang setšoantšo sa Hae. Ba ka taka ntho e tšoanang le Eèna. Empa ho ’na, E ne e ka, E ka ba Monna eo hola A ka bua lefatše le ka fela, empa feela a le mosa a le bonolo, hoo feela ho seng...likhutloana li ngata haholo mono ho tšoasoa ke borosolo ba setaki. ’Me ruri ke batla ho Mo bona tsatsi le leng, ka Seqo.

²⁸ ’Me ke makhetlo ke nahana, mohlang oo, eka nka be ke Mo utloile mohla A phahamisang matsoho a thekothata ao a re, “Tloong ho ’Na.” Ho bona mokhathala oo, le ho tepella ho Eèna, mohla A ne a khathalitsoe a tepeletse ke leeto la Hae, ho thoe, “Tloong ho ’Na, lona bohle ba khathetseng, le ba imetsoeng, Ke tla fa phomolo. Inkeleng joko ea Ka, le ithute ho ’Na, hobane Ke mosa ’me ke ikokobelitse.” Eka nkabe ke Mo utloile a rialo. Ke ne ke le sieo mohlang oo. Ke ne ke sa ema lephakong la Petrose, Jemese, le Johanne. Empa kea tšepa ke tla ema le bona mohla ke Mo utloang a re, “O bile khabane, mohlanka oa Ka ea khabane ea tšepehang, joale kena menyakeng ea Morena.”

²⁹ Le ho nahana hore bona bao ba ngotseng Bibele ena, Pauluse, Esaia, Jeremia, le baapostola bohle, le baena bao ba thekothata, hohle moo ba leng teng hona joale, hohle moo ba leng teng hona joale...Oona Molimo o seblitseng ka bona, ho bonela lintho pele le ho E ngola, le lintho tse joalo, oa ba abela

lineo tsa Bibele, boporofeta le ho bua ka lipuo, le lipontšo le mehlolo, le lintho tse joalo. Bona banna bao, hohle moo ba leng teng hona joale, re tla ba le bona 'moho. Oona Molimo oo ka eona ntho eo. Ha e sa hhole e le ke "tšepea joalo" hape, rea e tseba joale, ua bona, hobane boteng ba Hae bo ttitle 'me re e tseba e le joalo. Na ha rea tlameha ho ba batho ba thabileng ka ho fetisia lefatšeng? Eng, re ka hlola re lakatsa eng?

³⁰ Thapama ena ke qoqile le leqheku la monna, nkare, o itse o batla a le lilemo tse mashome a robeli a metso e robeli kapa tse mashome a robeli a metso e robong, e sa tsoa ba Mokreste. Ke mo kolobelitse ka Lebitso la Jesu Kreste, a sa apara letho ntle le sutu ea hae ea tloaelo ea Sontaha. Ka mo theolela mona metsing. Ke kholoa Moena Wood a ile a mo alima para ea marikhoe kapa ntho e 'ngoe, eaba re mo kolobetsa metsing mona. 'Me a re ho 'na, eare esale moshanyana . . . Hona joale ke monna ea ruileng. 'Me eèna, eare esale moshanyana, o boletse kamoo a sebelelitseng didolara tse mashome a mararo ka khoeli. O nyetse a se a holile haholo. O itse o nea lakalitse ho bona mohla a tsofalang 'me a sa tlameha ho kopa le ho robala seterateng. Eaba o nka linikele le lintho tseo a li bolokileng, a li sebelisa, tsa hla tsa sebetsa 'me tsa phaellana. Le ho etsa . . . 'Me joale ke eo joale, lilemong tsa mashome a robeli le ho hong, mashome a robeli-robeli kapa mashome a robeli-robong, kea kholoa o itsalo, o atametse mashome a robong, o sa ntse a tsamaea, o lutse hantle mona ka kerekeng hoseng hona. 'Me o hlophisitse ho lekaneng eibile ha a tlameha ho touta. Leha a ka phela lilemo tse ling tse lekholo, a ke ke a tlameha ho touta ka lichelete le lintho tse kang tseo. Pelō ea hae e a jeoa, ke mohalaleli ea lokileng, moena, o etsetsa Bakreste eng le eng, le lintho tseo a khonang ho li etsa.

³¹ 'Me eaba ke re, "'Me holima tseo tsohle, moena oa ka ea theko e thata, mohla u ne u tšoara lilemo tse mashome a robeli-robeli kapa tse mashome a robeli-supra, Molimo, ka mohau oa Hae, o ile a u nanabela a u nea Bophelo Bosafeleng Lehaeng la Lehholimo." U ka hlola u batla kekeletso efe bophelong? E, monghali.

³² 'Me maruo ohle ao re kileng ra a bokella, lintho tsohle tseo re li entseng lefatšeng, e ka bang life, seo monna a se entseng, u tlameha ho shoa 'me u siee karoloana ka 'ngoe ea eona.

Se rateng maruo fela a fats'e lena,
A bolang kapele-pele,
Aha tšepe ea hao Bosafeleng,
Le ka mohla ha li fele!

³³ Ke hantle. *Tšoara Letsoho Le Sa Fetoheng La Molimo*. Ke rata sefela seo. Re ne re se bina haholo mona tabernakeleng.

Nako eona e hlile e lehala,
Tsa lefatše ha li tiee ha li eme,
Aha tšepe tsa hao Bosafeleng,
Tšoara letsoho le sa fetoheng la Molimo!

³⁴ Motsofe 'mè oa ka o robetse koo bosing bona. Hoja ke ruile didolara tse milione tse lekholo, nka nehela peni efe le efe ho qoqa le eèna hora. Ehlide bo. Ka nèpo. Le holane a ruile limilione tse lekholo tsa didolara, li ne li ka mo thusa'ng joale? Le letho, ua bona. Tseo a li ruileng, ha a siee matlotlo a lefatše. Empa, o siea sena, o tseba Morena Jesu e le Mopholosi oa hae. Ke sona sehlooho sa taba.

³⁵ Holima tsena tsohle 'na ke . . . Ha re itekoleng bohle bosius bona. Re nahane pele re kenela thapelo, "Ebe ke—ke eme joang le Molimo bosius bona?" Re ke re hlahlobe lipelō tsa röna ho fumana. "Morena, haeba ke khopisitse moea kajeno, haeba ke khelositse leoto le le leng, haeba ke entse eng kapa ke buile phoso, oho Molimo, ako ntšoarele eona." Ua bona? Ha re . . .

Tumelo ea ka e lelala ho Uena,
 Uena Konyana ea Kalvari,
 Moloki ea Khethhehileng;
 Nkutloe joale ha ke rapela,
 Tlosa sebe sohle sa ka,
 'Me ho tloha kajeno
 Ke be oa Hao ka bottlalo!
 Ha ke tsamaea tsela e lifi,
 Le masetlapelō a ntika,
 Eba Lesupatsela la ka;
 Laela lefifi ebe leseli,
 Tlosa masoabi, litšabo,
 Ke se lelere
 Ka sutha pel'a Hao.

³⁶ Mpaballe tseleng, Morena. Mpaballe setsing sa thato ea Hao. Mocha kapa moholo, ha re tsebe lilemo tsa hao, hape u ka ba lilemo tse mashome a robeli, 'me ha u ka phela ho fihla hosasa, u tla phela ho feta moshanyana kapa ngoanana oa lilemo tse leshome le metso e tšeleta. Moshanyana le ngoanana bongata bo lilemo tse leshome le metso e tšeleta ba tla ea kopana le Molimo pele letsatsi le chaba hoseng. Ke hantle. Ka baka leo lilemo ha li amane le eona ka letho. Taba ke ena, ana u itokisitse ho kopana le Eèna? Ntho ea sehlooho ke eo.

³⁷ Ha re nahaneng lintho tsena joale re sa rapela, re sa inamisa lihloho tsa röna.

³⁸ Oho Ntata Bophelo ea Mohau ea Halalelang ea Hlomphehang, re kena ka pel'a Sefahleho sa Hao, Molimo o Matlaohle, ka teboho e tsoang botebong ba pelō tsa röna, haele moo re filoe monyetla oa ho lula mona bosius bona. Nakoana e fetileng ke tsamaile ke ea holimo le tlase kokelong eo, ha ke sheba ka mono, e le batho ba ilibaneng, ba bang ba bona ba lutla mali ba lla, le ba bang ba lahlehetsoe ke kelello ba bofiloe liphateng, oho Molimo, ke rapella hore ebe mang le mang oa bona o itokisitse, Ntate, e mpe ebe ba itokiselitse ho kopana le

Uena ha ba ka falla bophelong bona. Le ho nahana, Morena, hore bao e ka be e le rōna, e mong le e mong oa rōna ka mona, hola e se be ka mohau oa Hao. Empa U re lumeletse ho phelela ho kopana hape bosius bona, ho itlhophisa. Lintho tseo li feta lipelōng tsa rona le likellong tsa rōna hona joale, Morena. 'Me ere U sa hlahloba matheka a pelō ea rōna, ha ntho e sa hloekang e le teng ho rōna, Morena, e tlose, Ntate. Molimo, meea ea rōna u e khethele Uena.

³⁹ Re U leboha ka sohle seo U se entseng le ka seo re lumelang U tla se etsa. Le ka Leseli leo le hlahleng tlase mono ka tlung ea Khaitseli Bruce, ke U leboha ka hono, Morena, E tla ba matlafatsa.

⁴⁰ 'Me joale, Morena, ke U rapela bosius bona ho nchafatsa meea ea rōna molebe ka pel'a Sefahleho sa Hao mona tabernakeleng ena. Re a U leboha, Ntate, ka tabernakele ena. Re U leboha ka molebeli oa eona mona, Moena Neville oa rōna, monna ea ithobileng, monna ea khabane, monna ea tletseng lerato la Molimo nqa Kreste le nqa Kereke ea Hae. Ke U rapela ho mo hlohonolofatsa, le mothoana eo, molekane oa hae ea ratehang, le bana ba hae. 'Me, Morena, ba lumelle ho lula le rōna halelele mona lefatšeng. Aba sena. Leleka maloetse monyako oa bona, ba baballe ba koenne. Leleka maloetse hohle menyako ea rōna bohle, Morena, re baballe re koenne hore re tle re U sebeletse.

⁴¹ 'Me joale re rapalatsa meea ea rōna holima aletare, ho hlahljoja joale, ha ke bula mahlo a ka nakoaneng ho bala Lentsoe la Hao, ha e le thato ea Hao, 'me lotho e laotse 'na ho ngoathela batho Bohobe ba Bophelo. Joale, Morena, nthuse ho bua ntho e tla thusa moea o hlokang, o nyahameng mona bosiu bona. Le ho thusa hape hore ebe mantsoe a tokiso, re tle re tsebe mokhoa oa ho itšoara, seo re lokelang ho se etsa le mokhoa oa ho phela lefatšeng lena la joale, haeba re lebeletse ho fetola Leholimo Lehiae la rōna. Aba sena, Morena. Le ho folisa maloetse. E mong ha a le teng hara rōna, Morena, ea kulang, re U rapela ho e folisa. Matlafatsa ba tepeetseng. Rea ba rapella.

⁴² Ha re rapelle kereke ena feela, empa le likereke tse ling lefatše ho pota moo thapelo e hlahisoang, le ka liqelo tse pel'a Molimo, 'me balumeli ba lipelō tse lapileng ba mashome a likete ba hooeletsa, "Tloo, Morena Jesu, tloo!" Oh, ruri U tla utloa mohoeletso oa rōna, Morena, ka tsatsi le leng, le ho tla.

⁴³ Ha lotho e re laotse ho robala pele hoo ho fihla, ho Khutla hoo, re tseba terompeta e tla lla 'me ba shoetseng ho Kreste ba tla tsoha pele. Re tla hlaha re ntano tla ema ka pel'a Sefahleho sa Hao ka letsatsi le leng. Re U leboha ka sena, 'me re shebeletse nako eo, 'me joale hlaphisa lipelō tsa rōna. Hoba re e kopa ka Lebitso la Jesu. Amen.

⁴⁴ Joale, ha kea lekanya ho bua halelele bosius bona, mohlomong metsotsi e mashome a mararo, kapa e mashome a

mane, ka sehlooho se se nyenyane mona, pele ke rata ho bala Lengolo le fumanoang Bukeng ea Lipesalema. Lipesalema 105, le ho bala ho theohela temaneng ea 15, 'moho. Ha ke sa ntse ke bala Pesalema ena, ke batla hore le mameleise palo ea Lentsoe ka hloko, hoba Lentsoe la Molimo le ke ke la hlolleha le ka mohla.

Rorisang MORENA; le rapele lebitso la hae: tsebisang liketso tsa hae hara lichaba.

Joale le nahane hoo feela!

...rorisang MORENA; le rapele lebitso la hae: tsebisang liketso tsa hae hara lichaba.

Mo roriseng, ka lipina tsa lona: le nahane ka mehlolo ea hae...

Ithoriseng ka lebitso la hae le halalelang: lipelō tsa ba bao...batlang MORENA a li ke li thabe.

Batlang MORENA, le matla a hae: le batle sefahleho sa hae kamehla.

Hopolang mehlolo ea hae eo a e entseng; le meeka ea hae, le kahlolo ea hae tse tsoileng molomong oa hae;

Lona lesika la Abrahama mohlanka oa hae, lona bana ba Jakobo bakhethoa ba hae.

MORENA ke eëna Molimo oa rôna: likahlolo tsa hae li aparela lefatše lohle.

O se a hopola selekane sa hae ka ho sa eeng kae, le lentsoe le a le laoletseng moloko e sekete.

E leng selekane seo a neng a se hlabe le Abrahama, le kano eo a neng a e ane ho Isaaka;

Eo a kileng a etsa komelo e tiileng ho Jakobo, le selekane se sa feleng ho Iseraele:

A re, Ke tla u nea lefatše la Kanana, e be kabelo ea lefa la hao:

Enere ba bao... Enere—enere ba eso ho be bakae; ba sa fokotse, e sa le basele, ho lona.

Ba ntse ba sepela koo le lichaba, 'me le mebuso le merabe...

Ha a ka a lesa motho ho ba tuba: a laela marena, ka lebaka la bona;

A re, Se ameng batlotsuoa ba me, le se ke la etsa baporofeta ba ka hampe.

⁴⁵ Ke batla ho qotsa sehlooho se tsoang moo, sa: *Hlompho*. Palong ena mona, ke Davida ea hooletsang ho Morena. Re qosoa ho isa hlompho ho Molimo. 'Me ke ntho e le 'ngoe eo ke tla e lakatsa, ho khokhethela sena pelöng e 'ngoe le e 'ngoe ea motho ea ka mona bosius bona, hono, hara lintho tsohle tseo re li bonang li etsahala, re tsoanelo ho li hlompha. Ua bona,

re tšoanelo ho e hlompha. 'Me Davida o itse mohla banna ba Iseraele ba eso be bakae, mohlomong e le Abrahama, Isaaka, le Jakobo, etsoe a buile ka eèna, banna ba seng bakae, ho thoe O ile a laela lichaba le marena ka lebaka la bona. Molimo oa laela lichaba le marena, oa re, "Se ameng batlotsuoa ba Ka, 'me le se etse baporofeta ba Ka hampe."

⁴⁶ Koana ho Moeklesia, khaolo ea 12 le temana ea 13, ho ngoliloe tjena, ua bona.

Bofello ba taba tseo kaofela ke jona: Tšaba Molimo, u boloke litaelo tsa hae: hobane ke eona tšoanelo kaofela ea motho.

⁴⁷ Kakaretso ea tseo tsohle ke ho "tšaba Molimo." 'Me, athe, u ke ke ua hlompha pele u tšaba. U tlameha ho tšaba Molimo. Salomone o buile hape, ho Liproverbia, ha thoe:

Ho tšaba Molimo ke qalo ea bohlale:

Ho tšaba Molimo ke qalo ea bohlale:

⁴⁸ Joale, hoo hase ho Mo tšoha, empa ke ho isa ho Eèna "hlompho" le "tlotlo." 'Me ha u hlompha Molimo, u tšaba Molimo. U tšaba hore u ka tloha u sa Mo khahlise, u a tšaba esere ua etsa ntho e phoso. Eo u sa e batleng.

⁴⁹ Ke tšaba 'mè oa ka. Ke tšaba mohatsa ka—ka. Ke tšaba kerekere ea ka. Ke tšaba bahlanka ba Molimo bohle, esere ka beha kutu e khopang tseleng ea bona. Ke—ke tšaba batho. Ke tšaba batho ba motse, esere ka etsa ntho e ka ba nahanisang ebe thoe ha ke Mokreste.

⁵⁰ Ua bona, u tlamehile, le pele u ka hlompha, u tlameha ho tšaba. 'Me Molimo o a e batla, O batla hlompho. Molimo o etsa joalo, O a e batla. 'Me eona e tlisoa ke tšabo. 'Me rea tseba hore tšabo e lhahisa hlompho.

⁵¹ Joale, ha re re, monna, ke mopolasi kapa ekaba e—e mosebeletsi oa levenkele, 'me ha a natsoe ke mang. Empa e re a fumane mosebetsi lebothong la sepolesa 'me a theohe ka seterata, e le e—e lepolesa le qhoaetseng beche le apere yunifomo, (athe, ha ho mang ea neng a batla ho bua le eèna maoba), "Malume, mono, John! U phela joang?" Ua bona? Lebaka ke lefe? Ke ntho e kang thothomelo, kapa tšabo, kapa hlompho, ka baka la eona. Ha re re o khetheloa ramotse, kapa e ka bang...

⁵² Mopresidente Kennedy e ka be e le mang bosiusing bona, hola e se Mopresidente Kennedy? Holane e le eèna monna eo, empa e le mosebetsi oa Colgate tlase mona a lefshoa didolara tse mashome a mane ka veke? Ua bona? A ka feta hara motse mona 'me a sa tsotelloe ke mang, haese bomphato ba hae feela. Empa, ka ho ba Mopresidente oa Linaha tse Kopaneng, o loketsoe ke hlompho, u a bona.

⁵³ Le joalo, 'me erekaha Molimo e le Molimo, O lokeloa ke hlompho. Ke hantle. 'Me Eèna, re lokela ho Mo hlompha, le ho

Mo abela tšabo. 'Me hoo ho tlisa hlompho. Molimo o e batlela Eèna le bahlanka ba Hae bohle. Molimo o batla hlompho nqa bahlanka ba Hae. Eèna, bahlanka ba Hae, re ba tseba joang hore ke bahlanka ba Hae, hobane O netefatsa bahlanka bana ka Lentsoe la Hae. O tšoara bahlanka bana A ba fetole bahlanka ba Molimo, le ho ba paka e le bahlanka, ka ho phethisa Lentsoe la Hae ho sebetsa ka bahlanka bao. Ka baka leo ha u hlompha mohlanka eo, u hlompha Molimo. Ka hona haeba ke u hlompha le uena u ntłhompha, 'me re hlomphana, ke hona ha re hlompha Molimo.

⁵⁴ Na Jesu ha rialo, "Kamoo le entseng ba banyenyane bana, bana ba Ka, le ho entse ho 'Na. 'Me ho ka ba molemo ho uena ho tlameloa leloala molaleng, oa qoelisoa botebong ba leoatle, ho ena le ho khopisa e mong oa bona. Hobane Ke re ho lona, bonang sefahleho sa bona. . . Mangeloi a bona a bohile sefahleho sa Ntate oa Ka ea Lehelimong"? Joale, re ba tseba e le bona, hore röna, haeba re le bana ba Molimo, re karolo ea Molimo. 'Me Molimo o batla hlompho ena. 'Me hape Molimo o supa bao e leng bana ba Hae. O—O e supa ka mehlolo le ka lipontšo, le hore e a etsoa.

⁵⁵ Joale, re tlil'o qala joale re meme ba bang ba batho bana. Joale, hola nka rialo, ho thonya a le mong, ho qalisa, nka hopola e—e. . . Ha re nkaneng le Nooe, nakoana feela. Joale, Nooe o kile a fuoa tšenolo e tsoang ho Molimo, koana keha e thulana le eng feela eo mahlale a ka e pakang e nèpile. Empa koana o kile a bua le Molimo, le Molimo o no o buile le eèna. 'Me eaba o tloha a ea lokisa areka. Athe, basomi le banyefoli, etsoe Bibebe e ba tlalehile ba tla hlaha matsatsing a qetelo joaloka matsatsing ao, ha thoë basomi bao ba ne ba nyefola Nooe. Khele, ba mo hopotse a fapane hlooho hoba a ne a haha areka. Ka baka leo, empa eaba Molimo o lihela kahlolo holima basomi bao, kaha ba sa utloa lenqosa la Molimo le ho kena arekeng eo tlas'a therò ea hae, eaba Molimo o lihela likahlolo tsa Hae tse Khethehileng holima lefatše. Pele Oa hlophisetra bohle ba neng ba tla e amohela, ho e phonyoha, 'me haeba ba sa e phema, ho setse ntho e le 'ngoe feela. Efèla ha ba hanne boitlhophiso ba Molimo ba ho phonyoha, ho setse ho le hong feela, hoo ke kahlolo e Khethehileng.

⁵⁶ U ka etsa lintho tse peli feela, e itšetlehile holim'a mohau kapa kahlolo. U tlameha ho amohela ena kapa eane. Re eme mono bosiusg bona. Re amohela mohau oa Molimo kapa re emela kahlolo ea Hae. Ha ho mokhoa oa ho e koekoetla. Kamehla Molimo o etsetsa ba lakatsang ho phonyoha tsela ea ho phonyoha. Ebe moo A tlamehang ho. . . Ho setseng, ho tlameha ho emelana le kahlolo. Hase hoba Molimo a ba batlile joalo, empa kahobane ba ikhethetse tsela eo. Ua bona, ba etsa khetho ea bona. Re eme mono bosiusg bona, metsoalle, eona ntho eo. Re ka ikhethela tsela ea Molimo ea ho phonyoha, kapa

re ka emelana le likahlolo tsa Hae, re ka ikhethela eo re e batlang. Ha le a thaba bosing bona ha le ikhethetse tsela ea ho phonyoha? Hobane, bohole ba hanang tsela ea ho phonyoha, ba tla tlameha ho okameloa ke kahlolo.

⁵⁷ Nka boela ka lakatsa ho bua ka monna e mong. Ho kile ha hlaha moporofeta e moholo, oa senatla ea bitsoang Moshe. Batho (Israele) ba tlamehile ba be ba utloisisitse, ho latela Lengolo, hore Molimo o tlil'o ba loela le ho ba ntša Egepeta. Empa hang hoba Molimo o hlophise monna oa Hae le ho mo romela tlase Egepeta, ha ba ka ba mo hlompha. Ba mo lelekela kantle, ha thoe, "Ana u tla re bolaea kamoo u bolaileng Moegepeta eloa na?" ketso e liehisitseng bokhoba ba bona ka lilemo tse ling tse mashome a mane. Ba lutse bokhobeng ka ho sitoa ho hlompha moloaneli ea tlileng ho ba lokolla. Ketso eo ea boela ea ba busetsa littlamong. Hase kahobane Molimo o batlile hore ba lule, (nako li ne li phethehile), empa ba liehisitsoe lilemo tse ling tse mashome a mane hobane ba hanne ho amohela tsela ea Molimo ea ho phonyoha.

⁵⁸ Le joalo ke lumela e le lona lebaka bosiusing bona. Eona ntho eo, ua bona.

⁵⁹ Ba hanne tsela e tsoang, athe Molimo o no o ikemiselitse, o bile o boleletse Abrahama le bao ka selekane sa Hae (kamoo re balileng Davida ea e binneng bosiusing bona), O ne a ba tsepise hore O tla etsa ntho e itseng, ka baka leo Molimo o tla boloka tsepiso ea Hae. O ne a tla ba ntša, le hona, empa moloko o mong o ne o batle o shoa kaofela. Moloko oa khale o tsehileng Moshe, le lintho tse joalo, 'me o hanne ho amohela Molaetsa, moloko oo (lilemo tse mashome a mane) o ile oa shoa, 'me Moshe o tlie molokong o mong. Le bona seo ke se bolelang? Ha ba sa e amohele, ke moo Molimo o lumellang moloko oo ho shoa 'me O tla hlahisa moloko o mong ho e phethisa. Ka baka leo, ba kile ba e hana. 'Me eaba rea fumana, moloko o latelang ona o hlhang, mohla Moshe a ne a theohela mono ho inetefatsa . . .

⁶⁰ U a tseba, Moshe o ne tšaba ho boela a khutla. Moshe joale a se a le lilemo tse mashome a robeli, 'me esale a tsamaile lilemo tse mashome a mane. 'Me mohla a ne a buisana le Molimo sehlahleng se tukang, o itse, "Ke tle ke re ho bona ke romiloe ke mang?" Keha Molimo o se na lebitso. O itse, "Ke tle ke re ho bona ke romiloe ke mang?" Ha thoe, "Ha nka re, 'Molimo oa bontata lona o ipontšitse 'na,' ba tla re, 'Molimo oa bontata rōna ke mang?' Be, ebe nka reng ho bona?"

⁶¹ O itse, "Ba boelle u re 'KE NTSE KE LE TENG.' Ba boelle u re 'KE NTSE KE LE TENG.'" Eaba O re, "Ke'ng e ka letsohong la hao, Moshe?"

⁶² A re, "Ke molamu." 'Me eaba u o lahlela fatše oa fetoha noha. 'Me eaba o sunya letsoho la hae sefubeng sa hae, 'me la fetoha lepera; eaba o a le busetsa, la fola.

⁶³ A re, “Theoha, nka lipontšo tse peli tsena o li etse ka pel’ a batho, e tle e be nepahatso. Ka lipontšo tse peli tsena ba tla tseba hore Ke u rometse ho lokolla.” Oh, moena! Molimo o etsa hoo kamehla. Molimo o hlahisa lipontšo tse mohlolo kamehla. Ua bona?

⁶⁴ ’Me joale eareha a theoha a bitsa batho, a etsa lipontšo tsa hae ka pel’ a bona, Iseraele eohle ea lumela, e mong le e mong oa bona. Ba boela ba ea paleising, hape, ho lokolla. Eaba Faro o nka qeto ho ba hanel ka tokollo, ’me Molimo oa lihela kahlolo holima Faro. ’Me re tseba se hlahileng Egepeta.

⁶⁵ Ho a makatsa, kamora ho bona ho etsoa lipontšo tseo tsohle, eitseha ba fihla pel’ a Leoatle le Lefubelu, ha fumanoa hobane oona Molimo o entseng lipontšo tseo tsohle, mona pel’ a Leoatle le Lefubelu, ba belaetse Molimo oo, ntho ea pele, e leng hore O ne a khona ho hlophisa tsela ea ho phonyoha.

⁶⁶ Joale, re etsa phoso ea rōna hona moo. Ha re tšoaroa ke boloetse bo sa reng letho, mohla koluo a e nyenyane, kapa ha bothatanyana bo hlaha nqa efe tseleng, re se re oela kathoko. Mosokolloa e mocha; haeba a songoa ke e mong, ho thoe, “Be, ha u letho u mpa u le mohalaleli ea thethehang feela.”

⁶⁷ “Be, ha ke batle ho bitsoa mohalaleli ea thethehang.” U a bona, ua bona, ke moo, u fumana pelaelo eo.

⁶⁸ Ke hona mohla u tlamehang ho ema mono! Ke eona nako, hlompha moromuo. Ke eona nako ea ho—ho lebisa tlotla ho Molimo.

⁶⁹ ’Me Moshe o itse, “Ke entse lintho tsena, khafetsa, mehlolo e leshome ka pel’ a lona. ’Me Molimo o le neile mehlolo e leshome, ’me le tšohile ka pel’ a leoatle. Ruri. Ho tla hlola ho qosa’ng hape hore le lumele?” A khutla, a nka lere la hae a le phahamisa ka pel’ a leoatle, eaba lifefo lia theoha ’me tsabulula ka lehlakoreng lane, ’me ba tšela. ’Me hang hoba ba fihle mose oane, kapele ba qala ba korotla ka ho hloka bohobe. Ua bona, ntho e tšoanang. Eaba Molimo o ba nesetsa bohobe bo tsoang maholimong. Eaba ba korotla ka ho hloka metsi, e le ttlelebo e ’ngoe ka kamorao ho e ’ngoe. ’Me kea elelloa . . .

⁷⁰ U re, “Be, mohlomong e ne e le mofuta o sa sokolohang.” Be, mohlomong e ne e le bona. Letšoele le kopaneng le tsoile le bona, ke ’neta.

⁷¹ Empa ke sa batla ho le—ho le hopotsa taba e ’ngoe. Ha Molimo o romela lenqosa, ’me a nèpahatsoa, ka lipontšo, hore ke lenqosa le romiloeng ke Molimo, e itšetlehile ho bona ho mamela lenqosa lena. Ka nèpo. Ba tlameha ho mamela lenqosa leo ba be ba hlomphe lenqosa leo. Shebang Joshua le Kalebe, ba kile ba ema hantle lephakong la hae. E, monghali. Sohle seo Moshe a se kenetseng, le bona, ba se kenetse. Leha Moshe a nèpile kapa a fositse, ba lula le eëna hantle, le hona, ua bona, kaha ba mo tsebile e le lenqosa la Molimo.

⁷² 'Me mono, tsatsi le leng, re fihlela le eèna Meriama, moporofeta oa mosali, le Aarone, moprista e moholo, ba somme ka mosali oa Moshe hoba e ne e le Moethopia, le ho nahana, "Na basali ba rôna ba ne ba sa lekana, ho nyaloa, ho ena le ho theohela mono ho nyala mosali eo?" E ne e se khetho ea Moshe; e ne e le khetho ea Molimo ho Moshe. 'Me eitseha ha ba soma ka eona, taba eo ea halefisa Molimo hofihlela A otla Meriama, moporofeta oa mosali, a tlala lepera, khaitseli ea Moshe. Le re'ng ka taba eo? Eèna, moporofeta oa mosali, empa o ne a etsa'ng? O ne a soma 'me a hloka tšabo ho lenqosa la Molimo, lenqosa la selekane la letsatsi leo. 'Me keha a hloka tšabo. 'Me le Aarone, moprista e moholo, oona molomo oa Moshe, hantle, keha a mo tšehevitse.

⁷³ 'Me Aarone, hoba a bone khaitseli ea hae e otliroe ka lepera, a tloha a ea bolella Moshe, "Na u tla lesela khaitseli ea hao ho shoa?"

⁷⁴ Eaba Moshe o kena tabernakeleng a itihela pel'a Morena, a qala a hooeletsa a bitsa Molimo, ho hauhela khaitseli ea hae. 'Me Moea oa Morena oa theoha oa re, "Ea bitsa Aarone le Meriama ba tl'o ema pel'a Ka." Oh, khili!

⁷⁵ Molimo o batla hlompho! Molimo o romela Molaetsa oa Hae, le O mamele 'me le O tšabe. Ha ke tsotelle haeba ba O bitsa sehlopha sa bahalaleli ba thethehang, kapa ba O bitsa'ng; lefatše le ka etsa seo le se batlang. Empa lona le apare tšabo!

⁷⁶ Ka baka leo, eaba Meriama o eme mono. Molimo oa re, "Bitsa Meriama o be o bitse Moshe... kapa biletsha Aarone mona, moena oa hao le khaitseli ea hao, ho tla ema ka pel'a Ka."

⁷⁷ 'Me eitseha ba kena ka pel'a Molimo, Molimo o itse, "Na ha le tšabe Molimo?" Ho itsoalo ho moprista e moholo le ho Meriama moporofeta oa mosali. Ha thoe, "E mong ha a le teng, monna har'a lona, oa moea kapa e leng moporofeta, 'Na Morena ke Itsebisa eèna. Ke tla bua le eèna ka lipono le ho Itšenolela eèna ka litoro, le lintho tse joalo, haeba e le motho oa moea kapa e leng moporofeta." Empa ha thoe, "Mohlanka oa ka Moshe, Ke buisana le eèna molomo ho ea tsebeng." Ho re, "Na ha le tšabe Molimo?" Ka mantsoe a mang, "Ha le seba Moshe, le ntse le bua ka 'Na. Ha le sa hlomphe Moshe, ha le hlomphe le 'Na." Ha thoe, "Na ha Kea mo paka hara lona e le mohlanka oa Ka? Athe lona ha le mo tšabe ho hang."

⁷⁸ E ka ba thuto e kakang ho batho ba kajeno, ha ho hlompho, ha ho tlota!

⁷⁹ Joale O itse, "Me kahobane u sa etsa joalo, lepera le u tšoere ke hona. Lebaka leo lintho li etsahetseng ka mokhoa oo," ha thoe, "le tšoanetse le be le mo tsebile e le mohlanka oa Ka enoa. Ha le tsebe na, hore ha le buoa taba khahlano le eèna le e bua khahlano le 'Na."

⁸⁰ Eaba Moshe o rapella bophelo ba hae ho baballoa, 'me Molimo oa baballa bophelo ba hae. Ha a ka a phela halelele ka

morao ho mono, a shoa. Empa o ile a hlatsuoa lepera la hae, 'me a ntšoa liahelong ka matsatsi a supileng, u a tseba, ka baka la ntho ea hae... ho fumana, ho hlatsuoa, ho itlhoekisoa lepera la hae. Molimo o ile oa mo folisa.

⁸¹ Empa seo A neng a leka ho ba bolella sona, e le sena, "Le tlameha ho hlompha seo Ke se etsang."

⁸² 'Me efèla ha Molimo o sebelitse joalo tsatsing leo, 'me Molimo o sa fetohe, Molimo o re batla re hlomphile seo A se etsang. O batla hoo. Ha thoe, "Le tla se hlompha kapa ntho e 'ngoe e tla hlaha."

⁸³ Monna o mpoleletse tsatsi leng, a re ke... Monna oa mohloki, o fiela mmaparaka holimo mona, ho iphelisa. O ile a khahloleha, o maemong a mabe haholo. Ke Moluthere ka tumelo, 'me ba ne ba jele selallo. Ha a khone ho tsamaea a ikisa kerekeng, ka hona a tšoara tekisi. Hore e mo jele lisente tse mashome a robeli ho theoha le lisente tse mashome a robeli ho khutla. Moahisane oa hae, monna ea khopo haholo, a 'mona hoseng ho hong a rapela Thapelo ea Morena, 'me a mo tšeja, a mo etsa motlae. Eaba o re ho moahisane enoa, a re ho monna enoa, ho re, "U ne u ile kae ka tekisi hoseng hona?"

Ho re, "E ne e le selallo. Ke ne ke theohetse tlase kerekeng."

A re, "Selallo ke'ng?"

Ho re, "Keha re e ja bohobe le veine."

⁸⁴ A re, "Le 'na, ke se jele, hoseng hona tafoleng, ka selaese sa bohojana bo bobobe le ka paente ea wiski." Ua bona?

⁸⁵ Ke tseba bashanyana ba bararo, khetlo le leng, ba sommeng selallo kahara kereke, kea ba tseba. Eaba ba nyolohela phaposing ea—ea hotele ba nka lisemenchisi tsa nama ea kolobe le botlolo ea wiski, ba ejá selallo sa bona holimo mono, ba soma selallo seo ba se jeleng kerekeng ea Pentekosta. Ho eso fete likhoeli tse tharo kamorao ho mono, boraro ba bona bohole keha ba tlil'o... e mong keha a shoole, 'me ba babeli ba hlahletsoe setšeng sa mahlanya.

⁸⁶ U ke se hlompholle Molimo! U tlameha ho hlompha Molimo. Ha u sa e lumele, khutsa feela, suthela hole le eona. Kapa, etsa hoo, kapa tloo ka tšabo u e hlomphe. U se ke ua etsa motlae ka batho ba keneng Moeeng. U se ke ua bua ka batho ba rapelang ka Moea oa Molimo. Ako khaohane le bona.

⁸⁷ Ke ne ke eme hantle mane koung, ke rera, lilemo tse 'maloa tse fetileng, ke sa le moreri oa moshanyana. 'Me teng ha feta mosali, e le Mokatolike ka tumelo; empa ke ne ke tseba hore molekane oa hae—oa hae e ne e le Mokatolike, eèna e se letho. 'Me e le mosali e motle, ea khahlehang, a shebeha hantle, a ka ba lilemo tse mashome a mabeli, tse mashome a mabeli a metso e 'meli. Ke mo tsebile e le ngoanana feela mona motseng.

⁸⁷ 'Me eaba o a tla 'me a ema mono, 'me a re, "Nke ke ka lumella khomo ea ka eo ke e tefisang ho amohela borapeli boo William Branham a bo tšoereng."

⁸⁸ 'Me bosiu bo hlahlamang, le pele ke fihla ho eèna, ka utloela hore o a shoa sepatala, le joale ha ke tsebe se mo bolaileng. O ne a shoa koana sepatala, 'me molekane oa hae a tla ntata. A re... E ne e le Mokatolike. 'Me a tla, a re, "Tloo kapele 'me u etsetse mohatsa ka thapelo, esale a u hooeletsa mantsiboea ohle, o a shoa."

⁸⁹ Be, ka re, "Ke tla ea." 'Me ka kena koloing ka siea kopano e kene, ka potlakela sepatala. 'Me ka matha ke nyoloha litepisi, ka kopana le mooki, 'me a re, "O se a shoele."

'Me a re, "Tloo, u mo etsetse thapelo, leha ho le joalo."

Ka re, "O shoele."

Ha thoe, "Etsa thapelo, leha ho le joalo."

"E ke ke ea ba thusa ka letho joale."

Ho re, "Be, tloo u mo shebe."

⁹⁰ 'Me ka theoha. Ka moriri o bokhubetsoana bo rothofetseng, kea kholoa ho thoe, moriri oo o urburn. Mosali e motle haholo, lihlobanyana tse 'maloa li ne li topile sefahlehong sa hae mona, a le mahlohalo a masothoana. "'Me mosali eo," mooki a rialo, "Billy, o shoele ka habohloko hofihlela a hooeletsa a bitsa lebitso la hao ka bokhoni ba matla a hae, 'me a re, 'Le 'molelle a ntšoarele,' hofihlela lihlobanyana li topile sefahlehong sa hae." 'Me o ne a tonne mahlo a maholo ao 'me lintši tsa hae li sa a koahela kaofela. Hobane, le tseba se etsahalang ha motho a eshoa, phieo tsa bona le mala lia phethoha, 'me mono keha mocheso o kubella hohle. 'Me o shoele ka mahlomola a nyarosang hobane... e seng hobane a hlompholotse 'na, empa o hlompholotse Evangelii eo ke e rerileng, athe Molimo oo o ne o etsa mehlolo le meeka.

⁹¹ Nakoana e fetileng New Albany, eare ke sa eme mono ke bua le moetsalibe, ke mo tataisetsa ho Kreste, leqheku la monnahali ea matsoho a mahoashe kahara karache, e ne e le motsoalle oa ka, mokhoenyana oa hae o ne a tsamaisa karache e mabapi. Ke ne ke eme mono ke rera ka hora ea tinare, ke ejia semenchisi ke bua le eèna ka Molimo. Motšeare ke ne ke fumana moo nka eang teng ka nako ea tinare ho leka ho hapela Kreste moea. A re, "Mongh. Branham," a rialo. Ke ne le moshanyana oa moreri, ka bona. A re, "Mongh. Branham," ho re, "'mè oa ka o ne a tšoere borapeli bo joalo, borapeli boo ba maikutlo a tebileng." 'Me likeleli li ntse li qhitsa marameng a hae.

Ka re, "Ke nako e kae a iketse?"

Ho re, "Lilemo. O ne a nthapella kamehla."

⁹² Ka re, "Molimo o utloileng lithapelo tsa hae o ntse a leka ho mo arabela tsona hona joale."

⁹³ Eaba monna enoa o kena ka mono, a re, "Lumela." O ne a tahiloe. Ho re, "Hei, Billy, mamela." Ho re, "U ka chakela karace ea nako efe le efe," ho re, "u ka tla, empa," ho re, "u se ke ua tlisa borapeli boo ba hao mono ba mohalaleli ea thethehang."

⁹⁴ Ka retoloha ka mo sheba, ka re, "Hohle moo Kreste a sa amoheloeng, le 'na nke ke ka ea."

⁹⁵ Eaba o retoloha a re, "Ah, ako hlaphoheloe, moshanyana!"

⁹⁶ Eaba ke utloa ka pelōng ea ka, Puo e reng, "U kotula seo u se jetseng. Ho molemo ho uena ke ho tlamelloa leloala molaleng, ua qoelisoa matebong a leoatle." Eaba mokhoenyana oa hae ka sebele, eona thapama eo, o mo thula ka lori ea Chevrolet e jereng thoto ea litono tse peli, ea mo phetšeleta fatše mobung.

⁹⁷ Ua bona, u tlameha ho hlompha Molimo. U tlameha ho etsa hoo, uena... Molimo o batla hlompho, 'me O a e batla.

⁹⁸ Le Meriama o tlamehile a be a tsebile hantle ho feta moo. Le joalo o ne a tlamehile Mo-... Aarone o tlamehile a be a tsebile hantle ho feta, ho tseba sena, hore Moea oa Molimo o ne o tsamaisa Moshe ho etsa seo a neng a tla se etsa.

⁹⁹ Moreri oa Baptise o 'ngoletse lengolo matsatsi a 'maloa a fetileng, ho tsoa holimo mona. Oh, a hla a nkhulanya holim'a mashala hle! A re, "Thaka la sekhoa le kang uena! Sa tšebetso e ka lekanang le ea Elia, baporofeta," a re, "re u bona u ituletse hae, u sa etse letho!"

¹⁰⁰ Ka baka leo Billy ke mongoli oa ka, o ile a mo ngolla lengolo a arabela. Eaba o a nahana, "Be, kea kholoa nka mo araba," a rialo. Empa a hopola ho mpalisa pele a le arabela. Empa le ne le fupile puo e ngata ea poelano ho lona. A re, "Joale, enoa hase ntate oa ka, enoa ke 'na." Ho re, "U sa tsoa re tšebetso ea ntate e tšoana le ea Elia." Le ho re, "U itse u lula lebopong kae-kae, a kokositse thupa e tšoasang lihlapi letsohong, kapa holimo lithabeng, a kokositse sethunya letsohong la hae." Ho re, "U tla re'ng ka Elia ea lutseng lilemo tse tharo pel'a molatsoana?" Ho re, "Ana ha u tsebe hore ba tsamaisoa ke Moea oa Molimo ho etsa tseo ba li etsang?" Ua bona, mang le mang o batla ho e tsamaisa kamoo ba batlang. Empa monna o tlameha ho tsamaisoa ke Moea oa Molimo, 'me u tšoanetse ho e hlompha. Ke phetho.

¹⁰¹ Tsatsi le leng mona, moea o khabane, kahara motse mona, o bone moena e mong, a re, "Ebe Bill o hokae?"

A re, "O nyolohetse holimo Canada."

A re, "Kea kholoa ho ea tsoma?"

A re, "E, o il'o tsoma."

Ha thoe, "Ah, nyee eo ke matlakala!"

¹⁰² Ho lokile, monna eo, a sa tsebe hore ke lutse tlas'a matla a Moea o Halalelang, ka pono ea HO RIALO MORENA, ho ea

teng. U tla etsa'ng ka Letsatsi la Kahlolo? Ho tla thusa'ng, ho 'na ho tla tla ema pel'a moalo oa monna eo ho mo rapella? Tabeng ea pele, ha nkholoe. 'Me batho, ha ba fihla ba ntse bua lintho tsena, eka ha ke tsebe hore ha ba E lumele. Leha ba u phathatsa mokokotlo ba u bitsa "moena," koana u a tseba hore ha ba E lumele. Ua bona? Ha ba E lumele. 'Me u ka fumana... U ke ke ua ba etsetsa letho. Ba tla u bitsa, "tloo u rapele," empa ha e thuse letho. Hobo, u a bona, ha ba E hlomphe. U tlameha ho E lumela. Le shebe bao ba khonneng, ba hlile ba lumela 'me le shebe se etsahalang. Ua bona, u tlameha ho E hlompha.

¹⁰³ Jesebele, matsatsing a Elia, kamoo a kileng a hlompholla Elia! Kamoo a... Ka tšoanelo Elia e ne e le moruti oa hae. Ehlide. Oh, o hanne ho e amohela. Jo 'na, che! E ne e le e—e ne e le mosalume, kapa ea sa lumeleng, kapa—kapa morapeli oa lisèto. 'Me a ena le baprista ba ba hae ba bosalumele. Empa koana Elia e ne e le moruti oa hae, Molimo o mo rometse mono ho ba moruti. E ne e le moruti le haeba... Leha koana a mo omantse a 'moleletse libe tsa hae tsohle, koana e ne e le moruti oa hae. A sa batle ho e amohela ho hang, empa, keha a sa mo hlomphe. A mo hloile! Ehlide, o e entse bo. Eaba o hlaheloa ke'ng? Molimo oa lumella lintja ho mo jella seterateng. Ke hantle. Hobane eng? Ha a ka a hlompha Molaetsa o reriloeng ke Elia.

¹⁰⁴ Molimo o batla hlompho. U loketse ho ba le eona. Ho fumana letho le tsoang ho Molimo, u tla hlompha Molimo. 'Me u loketse ho e etsa ho tsoa pelöng ea hao, botebo ba pelö ea hao. U tšoanetse ho e etsa.

¹⁰⁵ Empa o hlompholotse Molimo mohla a ne a hlompholla moporofeta oa Hae. Joale, o tsebile hore Elia ke moporofeta. Ba ne ba se na letho Israaeleng ho bapisoa le Elia. Khele, lipono tsa hae le ntho ka 'ngoe keha e phethahetse pel'a Molimo. 'Me eëna, empa o ba ahlotse. Mohau, e! O ne a tsethemela bolumeli bofe le bofe ba mokhatlo, ntho eohle ese. 'Me hohle ho bitsoang sebe, o e ahlotse, ho tloha ho e nyenyane ho fihla ho e kholo, khosi le ntho eohle, a sa honyetse litebele holima mang oa bona. Empa keha ba tlamehile ho mo tseba e le moporofeta. Ba ke ke ba ithiba ho tseba taba eo. E, monghali.

¹⁰⁶ Esitile Akabe a lekile ho mo qosa ka komello. 'Me o hlile a rapela Molimo ho romela komello. E, o entse hoo. 'Me o itse, "Ke na le matla 'me ke tla thiba maholimo; pula e ke ke ea na, kapa ha lala phoka, pele ke e bitsa."

¹⁰⁷ Nahana ka Jesebelenyana eo ea netiloeng sefahleho, ea tilang fatše a ea holimo-le-tlase holim'a fuluru eo, "Moikaketsi eo oa khale! Moikaketsi eo oa khale, ea sotlang bana ba ba nyenyane bohole kantle mona," le tsohle ka mokhoa oo. Elia o ne a leka ho ba khutlisetsa ho Molimo, ho leka ho hapa sechaba ho boela ho Molimo. Ua bona? 'Me ea ka... U khonne ho bolella batho, "Le re le lumela ho monna ea kang eo, ea

notletseng linaha ka mokhoa ona, pula e sa ne le phoka e sa lale? Ka boikaketsi ba hae bohle kapa ka boloi ba hae kantle mono,” e bang o ne a batlile ho e bitsa’ng. “”Me hase letho feela ke e—e moloi kapa senohe, kapa ho nhong. O thibile maholimo ‘me pula ha e ne, o sotla batho bana bohle. ’Me le e bitsa thato ea Molimo?”

¹⁰⁸ E ne e le thata o ea Molimo! Ho sa tsotelehe eng, ua bona, u tšoanelo ho sheba eng... U tšoanelo ho hlompha Molimo ho sa tsotelloe seo A se etsang. O tseba seo A se etsang. E bonahetse e le mpe, bana ba sotleha, batho ba sotleha, likhomlo li shoa, linku li shoa, metsi a le sieo hohle, masiu a chesa a bipetsa, motšeare letsatsi le phatsima joaloka borase maholimong, lilemo tse tharo le likhoeli tse tšeletela. ’Me Elia a lutse holim’ a thaba, ho re, “Le phoka e ke ke ea theoha ho lona.” Ke hantle. Oh, ba ne ba mo hloile ha kakang!

¹⁰⁹ ’Me eitse ha eëna, Akabe, a mo fumana, o itse, “Ke uena ea tubang Iseraele, hase uena?”

¹¹⁰ Elia oa khale a boela a mo talima sefahlehong, ho re, “Lekhale, hase ’na, empa ke uena ea tubang Iseraele.” Ke hantle. Ua bona, esitile le Akabe a sa mo hlompha. ’Me na le tseba seo Elia se boleletseng Akabe, ho re, “Erekaha u tšolotse mali se nang molato a Nabothe, lintja li tla nyeka le a hao mali, le uena, seterateng.” ’Me li e entse! Kahobane ba hlompholotse lenqosa la Molimo. Ke hantle haholo. Ba ile ba e hlompholla.

Joale, Meriama o ile a e hlompholla. Aarone o ile a e hlompholla.

¹¹¹ Ho sa tsotelehe na u mang, u le Mokreste kapa u se Mokreste, u sa ntse u loketse ho isa lihlompho ho Molimo, le ho hlompha seo A se etsang, ho seng joalo u tla phethetsoa. Ke ho e amohela kapa ho kena kahlolong, u ka ipatlela ea hao.

¹¹² Kamoo nka emang ka bopaki, hora ka morao ho hora, lintho tseo ke li boneng bophelong ba ka, seo ke se boneng linaheng lisèle le likarolong tse ling tsa lichaba, le lintho tse joalo, lintho tse hlahileng. Empa ho tlola taba eo, le tle le chabeloe ke e—e mohopoloo oa seo ke lekang ho le bolella sona, le tšoanelo ho e hlompha. Ke bone bacha ba lutseng kahara kopano, ‘me ba keketeha ba tšeja ka kopanong, ‘me, katlasana ho lihora tse mashome a mabeli a metsi e mene, ba phetšeloe literateng. Ke bone batho ba bacha ba lutse ka tšebeletsong, nakong ea selemo hoba ke tlohe tulong eo, ‘me khetlo latelang, likhoeling tse ka bang tšeletela, ha ke khutlela tulong eo, e mong le e mong o batla a iketse, kapa a fenethiloe, kapa a otliloe kae-kae, ke boloetse le ke lintho. Ke hantle. U tlameha ho e hlompholla.

¹¹³ Ke hopola mosetsana e mong bosiu bo bong, Tennessee, mohla ke ne ke tsoa monyako, ke rera kerekeng ea Baptise, ke tsoa monyako. ’Me bosius boo ka ikutloa ke tataisoa ho

mo mema ho tla ho Kreste. Be, a ntja litše豪 sefaahlamahlo ha ke 'miletsha ho tla h Kreste. E ne e le e mong oa barali ba motikone. Le ho ema monyako bosius boo, a nkemela. 'Me ha ke tsoa, a re, "Ke batla hore u tsebe ntho e 'ngoe hona joale, u se hhole u ntlontlolla joalo hape."

Ka re, "Molimo o ne a u bitsa."

¹¹⁴ A re, "Matlakala. Ke mocha," ho re, "ke sa na le nako e ngata bakeng sa hoo." Ho re, "Ntate oa ka o na le borapeli bo bongata bo re lekanang bohle lapeng leso."

¹¹⁵ Ka re, "Ha bo a lekana uena, khaitseli, mang le mang o tlameha ho fumana borapeli ba hae."

¹¹⁶ A re, "Ha ke batla motho ea buang le 'na ka taba eo, ke tla lata motho ea nang le kelello, e seng motho ea kang uena."

¹¹⁷ Ka re, "Tsamaea, u ka bua seo u se batlang. Ha u ntlhophe ka letho, empa ka tsatsi le leng u tla itšola."

¹¹⁸ Nakoana ka mora moo, ha ke feta motseng. Ke enoa a tla a theosa ka seterata lionoroko tsa hae li leketla, a thetheha ka sikarete letsohong la hae, 'me a 'neelelsa ho fupa wiski. Ntho e tšoanang! 'Me bopaki ba hae ke bona, o itse, "U sa hopola bosiu mohla u ne u mpitsa mono?" Ho re, "E ne e le 'neta." A re, "Moea oa Molimo o ne o mpakela bosius boo, o leka ho ntlisa." Le ho re, "Ho tloha mohlang oo ke bona moea oa 'mè oa ka o halikeha liheleng joaloka panekuku, le ho e tseha." Ke sona se etsahetseng, ua bona.

¹¹⁹ U loketse ho hlompha Molimo. Ke phetho. U loketse ho e etsa, moena. Ke phetho. Jesebele o e hlompholotse.

¹²⁰ Le ho hopola ka mohla o mong, mohla ho hlahang bana ba se nang tšabo, ba ne ba holetse lelapeng.

¹²¹ Elia, hoba matsatsi a hae a fete, ehlide, keha batho ba mo hloile kahobane a lihetse tlala holim'a naha. Keha batho ba bang ba rutile bana ba bona ho re "Elia, monna ea kang eo," o ne a fetotsoe a isitsoe Leholidong. "O shoetse kae-kae, 'me ba mo epetse ba mo patile." Ba—ba ne ba sa e lumele.

¹²² Eaba Elisha o tlatsa malulo a hae, joale e ne e le lenqosa la letsatsi joale hoba Elia nyolloe. Eaba o haola le motse o itseng, 'me bana, bana ba banyenyane ba motse oo, ba tsoa ba matha, ba mo soma, ho thoe, "Hela, uena ralefatla, hoganeng u sa nyoloha joaloka Elia?" Ua bona, ba ne ba sa lumele hore Elia o nyolohile. Ke moo he. E ne e se ka lebaka la ho hlompholla monna eo; e ne e le ka ho hlompholla Molaetsa oa hae. E ne e le mohlahlami oa Elisha...oa Elia. Tlolo e ne e le holim'a hae, moea o Elia o ne o lutse holim'a hae. Eaba o nyolohela hantle mono 'me a etsa tsona lintho tse entsoeng ke Elia. Alleluia!

¹²³ Jesu o itse, "Ea lumelang ho 'Na, mesebetsi eo Ke e etsang le eëna o tla e etsa." E. "Mehlolo ena e tla tsamaea le ba lumelang."

¹²⁴ Ba ile ba e hlompholla. 'Me ba hlompholotse Elia hoba a ne a lumetse Elisha, hobane Moea o ne o le holim'a hae. Eaba o retoloha a phutla Jordane ka kobo ea hae, a phetla Jordane, a nyoloha a etsa eona mehlolo e kang e entsoeng ke Elia. 'Me esita le bareri bohole holimo mono sekolong sa baporofeta, ba itse, "Moea oa Elia o lutse holim'a Elisha," taba eo ea utloahatsoa naaha ka bophara.

¹²⁵ 'Me batho, kea kholoa ba iqabola ba tšeha, ha thoe, "Hei, hei, shebang!" Ba re, "Sehlopha seo sa bahalaleli ba thetthehang, se hlanyang, se re, 'Monna eo o nyolohetse Leholimong a sa shoa, lipere li theohile.' Ha rea bona letho." Ehlide ha ba khona. Ehlide che bo, ha ba khona. "Ha rea bona lipere tsa letho. Ha rea utloa makoloi a letho kae kapa kae. Matlakala! Thaka leo la khale le shoele 'me ba mo epetse, 'me ba ntse ba leka ho fehla ntho ka eona."

Le kajeno ba rialo, ho a tšoana!

¹²⁶ Le ka Jesu ba itsalo, ba itse, "Khele, ba tlie ba utsoa 'Mele oa Hae bosiu." Ba bile ba lefa masole ho e paka. Empa O tsohile bafung!

¹²⁷ 'Me Elia o ne a thotoe ka koloi ea mollo, ka lipere tsa mollo.

¹²⁸ 'Me eitsheha moporofeta e mocha enoa a tsamaea mono, a theoha a haola le motse. 'Me o ne a phumuhe moriri, e sa le mohlankana. O ne a theoha, eaba bana ba banyenyane bana ba mo sala morao, ho thoe, "Hei, hore'ng u sa nyoloha le Elia 'moho?" Ho re, "Uena ralefatla, tooe!" Ua bona? 'Me keha ba ntse ba e hlompholla. 'Me eaba Elia o etsa'ng? A sokoloha, ka matla a Moea, 'me a rohaka bana bao. Ha etsahala'ng? Libere tse peli tse tšeali tsa tsoa morung tša bolaea ba mashome a mane a metso e 'meli a bona. Hantle. Ho hlompholla, ho hloka tšabo. U ke ke ua etsa joalo. U loketse ho hlompha Molimo.

¹²⁹ Hola e mong oa bana bao a itse... Joale, hola ntata bona le 'mè ba itse, "Joale, shebang, lona bana, ba re Elia o nkuoe. Joale, ha re tsebe taba eo, empa, leha ho le joalo, ha ke-ke-ke tsebe haeba ho le joalo kapa che, empa kea le bolella molemo ke ho se bue letho ka eona. Le tsoelepele feela. Ha a feta... Ho thoe o tlil'o feta hara motse kajeno, o tlil'o tšoara kopano ea seterata holimo mono. Haeba a ka etsa, haeba lona bana, ha le ea sekolong kajeno, le kopana le eèna, le re feela, 'U phela joang, mohlomphehi. U phela joang, monghali?' Kapa ntho e kang eo. Le qoqe le eèna."

¹³⁰ Empa sebakeng sa hoo, ntle le pelaelo ba ne ba lauoe lapeng. Oh, ba utloile papa le mama ba lutse tafoleng ba tšeha, le e mong, ho thoe, "U tseba'ng! Ho thoe mohalaleli ea thetthehang eo o nkuoe. Na u kile ua lumela ntho e joalo? 'Me ho thoe thaka lena la khale ralefatlanyana enoa, ea lefatla joaloka mokopu holimo mono, ha eso tšoare lilemo

tse mashome a mararo a metso e mehlano, 'me ke enoa o theohela mono, 'me ho thoe o tlil'o tšoara kopano ea seterata, re lebeletsoe ho lumela lithole tse kang tseo. Khele, hase letho haese nthoana... ke e—e sesomo feela. Ke phetho. Hoba, ha a batle ho tla likerekeng tsa rōna, O itšoanelā le Elia, ha a batle ho etela likereke tsa rōna. Be, o tla... Mohlomong ke boupelli ba mofuta, ho upa, o tšoere qhekanyetso, joaloka Elia." Ke ha ba sa mo lumele. Ka baka leo, bana ba banyenyane bana ba rutiloe lapeng.

¹³¹ Hola ba rutiloe tšabo le hlompho, ba ne ba tla tsoela mono ka pel'a moporofeta eo oa Molimo ba ikopele thapelo bobona.

¹³² Empa ba ne ba rutiloe ho keketeha le ho tšeja, le ho soma. Haholo ntho e kang ea bana, mo... bongata ba bona kajeno bo soma ka tšebeletso ea seterata, ba iqabola ka therø ea Evangeli.

¹³³ Ka baka leo, eaba Elia o ba rohaka, ka Lebitso la Morena. Hase ka lebaka la bana bao, empa ka lebaka la batsoali ba se nang tšabo ba holisitseng bana ka tsela eo, ho hlompholla Molimo. Libere tse peli tse tšeji tsa tsoa 'me tsa bolaea mashome a mane a metso e 'meli ea bona. Joale, ke hona ho hloka tšabo hoo. Molimo o batla hlompho! Eitseha ha ba hlompholla moporofeta oa Hae, ba ne ba hlompholla Eèna; ho sa tsottelehe ba ne ba sa lumele hakae, ba ne ba tšoanetse ho koaloa melomo ea bona, ho chechella hole le eona. Empa, che, keha ba tlamehile ho nokela kabelo ea bona e lekanang le nikeli. Keha ba tlamehile ho bua se sa ba tšoanelang. Eaba ba hlaheloang ke'ng?

¹³⁴ Ha re nkeng batho ba kileng ba e hlompha. Ha re nkeng mosali oa Moshuneme, nqa eèna moporofeta eo, Elia. Hantle-ntle e ne e se Moiseraele. O ne a tsoa Shuneme, empa o lumetse Molimo. 'Me o bone monna enoa a haola le motse, a mo utloa a bua, o bone mehlolo e entsoeng ke eèna.

¹³⁵ Nalane e a bolela, ha ke tsebe haeba e le 'nete kapa che, ho thoe tsatsi le leng sehlopha lintja se kile sa leka ho tšoara ngoanana e monyenyan. Joale, taba lena hase Lengolo, ke pale eo ke e balileng feela. 'Me ho thoe mosali enoa oa Moshuneme o ne a eme koung, 'me a bona lintja tsena li tla bolaea ngoanana enoa. 'Me ka nako eo monna ea halalelang enoa a feta har'a motse, eaba o phahamisetsa lere la hae nqa Molimo, 'me a kopela bana ba banyenyane bao mohau, eaba lintja li sokoloha li ba tlohela. Hore e ne e le 'nete kapa che, ekare ke eona, ha ke tsebe.

¹³⁶ Empa, leha ho le joalo, mosali enoa o itse, mohla Bibele, mohla a "lemohang hore enoa e ne e le monna ea halalelang." O lemohile hore ntho e etsahetse. O bone seo a neng a le sona, 'me "a lemoha hore e ne e le monna ea halalelang ea tsoang ho Molimo." 'Me, sebakeng sa ho mo hlompholla joaleka Jesebele,

a mo hlompha. Eaba o bolella monna oa hae, “Re khona ka ho fetisisa ho etsa sena. Kea u rapela, ha re mo ahele ntlyonyana kantle mane. Re mo nyehelo tulonyana, hobane o khathetse. Esale ke mo beile leihlo. O a tsofala, ‘me ke bone moriri o moputsoa o lepeletse telung tsa hae. Lerenyana la hae la khale, liphakana tsa hae li otile ha a tsamaea, liphakana tsa hae li sosobane. ’Me ke enoa a tla a tsamaea joalo, a jere lefisonyana la oli lephakong la hae, a itlamile ka letlalo la nku, letsatsing le chesang, ‘mele oa hae o shebeha o tlabohile ‘me o tlerefetse. Kea u rapela, ha re mo ahele nqalo ea phomolo, ho khefutsa mona. Ha re fumane sehahi se tla mo ahela tulonyana, re mo nyolle, kaha ke hlokometse hore moea oa hae, ka moea oa hae, ke monna ea halalelang. Ke monna oa Molimo.” Oh, oh, ke phapang e kakang!

¹³⁷ Joale, eaba monna oa hae o a lumela, a...ekaba o itse, “Ratu, le ’na, ke lemohile monna eo. Nkile ka mo mamela, esale ke mo beile leihlo, ke bone mesebetsi ea hae. Kea tseba hore ke monna oa Molimo ea halalelang. Re tla etsa hona hoo hantle.” Eaba ba bitsa sehahi ‘me sa mo hahela tulonyana e ntle, ba mo hlophisetsa moalonyana oa ho phomola, ho paqama le ho phomola. Ba mo hlophisetsa nqalo ea ho hlatsoa maoto a hae, ba lata metsi le lintho, le ho e hlophisa ka mono.

¹³⁸ ‘Me enereha moporofeta eo a feta, ehlide, moea oa hae o ne o thaba, ho ipona a etselitsoe ho hong. A re ho Gehazi, “Tsamaea, u ’mitse, ‘me u ’motse seo nka mo etsetsang sona, na ebe nka ‘bua le morena, le molaoli ea ka sehlohong?” Eèna...

¹³⁹ A re, “Ke ahile le batho ba heso, ‘me ha ke hloke letho.”

¹⁴⁰ Empa Gehazi a re, “Ha a na bana. Le monna oa hae o se a holile lilemong, o tsofetse. Ha ba na bana.”

¹⁴¹ ‘Me kea kholoa, eare Elia a sa robetse mono moalong oa hae o monyenyan, oo a mo sitsitseng ka ho mo lokisetsa oona, maoto a hae a hlatsoitsoe, le litelu tsa hae li hlatsoitsoe, le lintho, a paqame mono, ntle le pelaelo a bona pono ea Morena (hoba, esale ba etsa joalo). Eaba o re, “Tsamaea, u ’mitse, u mo laele ho tla ema pel’ea ka mona.” Oh, khili! “Tsamaea, u ’mitse, hobane o ne a o ne a hlomphile Molimo. Tsamaea, o mo bolelle ho tla koano.”

¹⁴² Ha a hata sefate sa monyako, a re, “HO RIALO MORENA. Ka nako e kang eona ena, isao, o tla sikara lesea.” ‘Me ka nako e kang eona eo, isao, a fumana lesea.

¹⁴³ Eaba Satane, mohla a batlang a etsa lilemo tse leshome le metso ‘meli, ntata’e a mo ntšelitse tšimong tsatsi le leng, eaba Satane o re, “Ke tlil’o timetsa ngoana eo,” eaba o mo otla ka setorouku sa letsatsi. ‘Me eaba o shoela liphakeng tsa ‘mè oa hae.

¹⁴⁴ Na e kile ea mo nyahamisa? Che, monghali. O itse, “Qhaneha mulete. ‘Me u tsoele pele, u se ke ua ema. U hloe

Thaba Karmeles, u tobe thaba, kaha a sa tsoa feta mono tsatsi le leng.” Oh, oh! Oh, oh! Oh, oh! Khele! Ke moo he. Ke hlompho eo. Ke hlompho eo.

¹⁴⁵ Monna oa hae a re, “U ea ho monna oa Molimo.” Ho re, “Khoeli ha eso thoase le hona ha eso be sabbatha, ha a eo mono holimo nthong ea hae...”

¹⁴⁶ A re, “Tsohle li lutse hantle, ako nqhanehele mulete u ntese ke tsamaee.” ’Me eaba ba tsamaea.

¹⁴⁷ Eaba ba nyolohela thabeng. ’Me eareha Elia oa khale a a sheba kantle ho lehaha, ’me a tsoa ka mono a talima, a re, “Enoa ea tläng ekare mosali eo oa Moshuneme.” Ho re, “O tšoanetse a be a hlabe hile.” A re, “Tsamaea, u mo khahlanyetse. ’Me, e tle re,” ho re, “pelō ea hae e hlabe hile, athe Molimo ha o a mpolella letho ka eona.”

¹⁴⁸ Ua bona, Molimo ha o a tlameha ho u bolella sohle, ua bona, esita le baporofeta ba Hae ha A ba bolella sohle. O mpa—O mpa feela A etsa seo a se batlang, Ke Molimo.

¹⁴⁹ Ka baka leo...Joale, Elia o itse, “Molimo!” Ho ka thoeng hola Elia a buile tjena, “Hobane’ng U sa mpolella lebaka leo a a le tlelang? Hobane’ng U sa mpolella ka eona eohle?” A ka be a a bona letho. Empa keha ho itoketse ho Elia, e ka bang eng.

¹⁵⁰ ’Me holane a nyolohile a ntse a re, ebe o re, “Athe u ipitsitse mohlanka oa Molimo? Moikaketsi tooe! Ke lumela hore ha u letho u mohalaleli ea thet hehang feela”? E ka be e sa etsahala. Ua bona? Ka linako tse ling Molimo o re fetisa hlahlobong, ho bona seo re tläng ho se etsa.

¹⁵¹ Ka baka leo, sebakeng sa hoo, a mathela hantle maotong a hae a khumama, eka ke ho Molimo. ’Me a re, eaba o mo senolela bothata ba hae. ’Me Elia a re, “Nka lere la ka ’me u le bee holim’ a ngoana.”

¹⁵² ’Me hoba a etse, mosali a re, “Ka Morena Molimo o phelang, le ka moea oa hao o sa shoeng,” oh, khili, “uená mohlanka oa Molimo, nke ke ka u tlohela. Ke tla lula mona Molimo a be a romele pono.” Elia oa khale a lula mono nakoana e seng kae; a itlama letheka, ’me a tšoara lere la hae ’me ke enoa a tloha.

¹⁵³ A kena phaposing moo lesea le robalitsoeng, lesea le shoeleng. A ea holimo-le-tlase holim’ a fuluru, ka mokhoa oo, makhetlo a ’maloa. Ka baka la mosali ea apereng tšabo, mosali ea mo hlomphileng, monna ea mo hlomphileng, ’me a mo lumela e le monna oa Molimo, a ea morao le pele le holimo-le-tlase holim’ a fuluru hofihlela Molimo a arabela. Amen. Eaba o ikotlolla holima lesea ’me la ithimola hasupa, a le nka a le neeletsa ’mè. A tsoa, a khutla a kena lehaheng. Kahobane a hlomphile monna oa Molimo! Amen. Molimo o batla hlompho.

¹⁵⁴ Le re'ng ka Marethla? Kamehla a hopola ho lokisetsa Jesu tinare e monate. Maria eëna a batlile ho utloa Lentsoe la Molimo, ka hona a lule a Mo mamele. A sa tsotelle hore na lilata tsa mosamo li fetotsoe na, kapa ebe e—e likharenete li hlohloriloe lerole na, kapa ba jele kapa che, a batlile ho utloa seo Jesu a tlang ho se bua. Empa Marethla esale a batlile ho Mo phehela tinare e monate, le ho kholiseha hore setulo se bonolo 'me se beiloe ka tšoanelo, le hore sohle se hloekile ka mokhoa oo. Empa o ne a Mo batlile, a batlile ho sebeletsa Jesu ka mokhoa oa hae, le Maria a batlile ho e sebetsa ka mokhoa oa hae. Empa ka tsatsi le leng mohla Lazaro a ttileng... Batho bongata ba bua khahlano le Marethla, ho thoe o tlamehile a be a ile a thahasella ho feta. Oh, che, nakoana feela. Ua bona, eaba ho fihla mohla Marethla a itšupang. 'Me eareha Jesu... Mohla Lazaso a ne a eshoa, khaitseli ea hae, o ne a romele ho Eëna ho tla mo rapella. Ha A ka a tla. A iphapanya pitso eo, A ea tulong e sele. A boela a laetsa, le joale a iphapanya pitso eo.

¹⁵⁵ Empa ho feleng mohla A fihlang, ea ka joale o tla Mo khahlanyetsa a re, "Hobane'ng U sa tla? Hobane'ng U sa tla ha ke U bitsa? Khaitseli ea ka e ne e robetse mono, e kula. Re tlohetse kerek ea röna, re tlohetse mokhatlo oa röna, re entse hohle ho sala Molaetsa oa Hao morao, kaha re lumetse U le Monna oa Molimo. Empa ebe Monna oa Molimo a ka khona... 'Me röna re likhutsana, re bana ba bararo ba likhutsana mona, batho ba bararo ba likhutsana, 'me re ne re iphelisa ka ho rokela tempele likharetene. Re ne re le litho mono, 'mè oa röna le ntate e ne e le litho mono. Empa kahobane U re ngokile ho kenela ntho ena, ho lumela Sena, seo U lekang ho se ruta, U ipitsa Mora oa Molimo le Moporofeta ea tsoang ho Molimo, le lintho tsena, re khonne hoang ho U lumela, Monna ea sa nkutloeng ha ke U bitsa? Mohla ke ne ke hloka 'me ke U hloka, U iphapantse molaetsa oa ka oa ikela. 'Me eaba ke romela labobeli, Ua 'na ua iphapanya. Hobane'ng U entse ntho e kang eo?" Hola a etsa ntho eo, pale ekabe e fapane bosiusing bona.

¹⁵⁶ O ile a etsa'ng? A Mo mathela ka kotloloho, a itihela maotong a Hae a ba a re, "Morena, hola Ua fihla mona, khaitseli ea ka a ka be a sa shoa." Oh, ke moo he. O ne a etsa'ng? O ne a hlompha. O ne a eme ka pel'a Sefahleho sa Molimo, 'me a Mo hlompha. A Mo bitsa Morena oa hae. "Morena, holane Ua fihla mona." (E seng, "Ke rometsoe hore U latoel!" Keha e lebetsoe kahohle.) "Joale U teng mona, ua bona. Hola Ua fihla mona, khaitseli ea e ka ba e le teng, e ka be e sa shoa."

A re, "Khaitseli ea hao o tla boela a tsoha."

¹⁵⁷ "Oh," a re, "e, Morena, kea tseba o tla tsoha ka letsatsi la getelo."

¹⁵⁸ 'Me—'me A re, 'me eèna...A re, "Empa ke 'Na tsoho le Bophelo. Ea lumelang ho 'Na, leha a shoele, o tla boela a phela. Ea phelang 'me a lumela ho 'Na a ke ke a shoa le ka mohla o le mong."

¹⁵⁹ "Ke a lumela, Morena, hore U Mora Molimo ea neng a tla tla lefatšeng. 'Me esita le joale, Morena!" Oh! "Esita le joale!" (E seng, "Morena, U tšoanetse u be u entse *sena* 'me U tšoanetse u be u entse *sane*!") Empa, "Esita le joale, sohle seo U se kopang ho Molimo, Molimo o tla U nea sona." Ke eona.

¹⁶⁰ Hola re ka rialo ho motho bosiung bona, "Oh, moena oa ka, kea lumela seo u se kopang Molimo, Molimo o u nea sona"? Litholoana tse tšoanang li ne li tla latela.

¹⁶¹ Empa ho sa tsottelehe hore O ne a le mokae, haeba A ne a... 'Me re Mo tseba e ne e le Mora Molimo. Holane a e hlompholla, e ka be e sa sebetsa. E ne e tsoa pelöng ea hae. O itse, "Esita le joale, Morena, sohle seo U se kopang Molimo, Molimo o tla U nea sona." Ke eona. Ke eona. Ho tsoa pelöng ea hae, o e lumetse. Hola A kena letšolong la ho tsoma kapa leetong la ho tšoasa lihlapi, e ka be e sa etsa phapang ho eèna.

¹⁶² Che, holane Elia a kena leetong la ho tsoma kapa a ea 'nqa ese, e ka be e sa etsa phapang ea letho, ho mosali oa Moshuneme. A sa ntse a mo lumela e le monna oa Molimo. Ehlide. Ho sa tsottelehe seo a se entseng, e sa ntse e le monna oa Molimo, ho eèna, hoba o bone Molimo a tsamaea bophelong ba hae.

¹⁶³ 'Me, ho Maretha, ho sa tsottelehe se hlahileng, o bone seo Molimo a mo etselitseng sona. O itse, "Esita le joale, Morena, sohle seo U se kopang Molimo, Molimo o tla U nea sona." Ah, ke moo he.

¹⁶⁴ O itse, "Khaitseli ea hao o tla boela a tsoha." Eaba O re, "Le mo patile kae?" Eaba ba theohela lebitleng. Eaba o bitsa Lazaro lebitleng, hoba a shoe matsatsi a mane. Hobane'ng? Hobane khaitseli ea Lazaro a hlomphile seo A neng a le sona.

¹⁶⁵ Ha u sa khone ho hlompha monna, hlompha ofisi eo a e tšoereng ho Molimo. Ke hantle haholo, ua bona, mo hlomphe. Ha moreri a e tla a nyoloha, moruti oa lona, le mo hlomphe kamehla. Ke utloile liphutheho li bua ka moruti oa tsona, ho bua ka eèna feela, ba mo bua hampe, ba mo tloka. Moruti eo a ka le etsetsang le ka mohla? A ke ke a khona. Ha u—u khone, ha u hlo... Ha ke bue ka kereke ena, empa ke bua ka likereke tseo ke li boneng, hore haeba u... U tlamehile ho rata moruti oa hao. U tlameha ho tseba hore ke motho oa nama, empa koana Molimo o mo beile moruti oa Hae. Moea o Halalelang o mo beile moalosi, le tlameha ho mo hlompha ka mokhoa oo. 'Me ho sa tsottelehe seo moruti a se entseng, haeba u mo hlompha pelöng ea hao, e le mohlanka oa Molimo, Molimo o tla u hlomphela ho etsa joalo.

¹⁶⁶ “Eo ea—eo ea amohelang ’Na, o amohela Ea Nthomileng,” Jesu o itsalo. “Ea sa amoheleng ’Na, a ke ke a amohela Eèna.” Ua bona, ba bitsitse Molimo Ntate oa bona; O itse, “Ntata lona ke liabolosi.”

¹⁶⁷ Ka baka leo, u a bona, u lokela ho e hlompha le ho e lumela, ho Mo lumela a le teng. E, Maretha o e lumetse.

¹⁶⁸ ’Me ke buile ka eona hoseng hona, ka mosali eo oa Moserofenisia ea nyolohileng mohlang oo. Shebang kamoo a latoletsoeng, hampe. E ne e le eo, Mojuda; eèna e le Molichaba, eaba o a Mo mathela. A sa tsebe mokhoa oa ho Mo atamela, empa o ne a hloka, ’me o Mo tsebile e le Mora oa Molimo. O e lumetse. Eèna... Efèla—efèla ha Molimo o khonne ho arabela lithapelo tsa Hae nqa ba bang, O tla arabela thapelo ea hae. ’Me a tseba hoba seo A se buileng e ne e le Lentsoe la Molimo. E ne e le Lentsoe la Molimo ho Bajuda, e ne e le Lentsoe la Molimo ho Balichaba, hape, eng le eng eo A e buileng. Eaba Jesu o mo emisa hlahlobong. O itse, “Morena, ako nkauhele!” Joale shebang. Che, O itse... “Uena Mora Davida,” kaha a utloile Bajuda ba rialo, “Uena Mora Davida.” Joale, ho eèna E ne e se Mora Davida. Ua bona? ’Me O itse... “Uena Mora Davida!” Mojuda a ka be a e atametse joalo, kaha a utloile ka ba bang bohle. A leka ho tla joaloka bona, kaha a ne a leka ho apara hlompho. O ne a leka ho supa hlompho ea hae. ’Me o ne a sa iketsise; Jesu a ka be a tsebile. Che, A ka be a tsebile. Eaba o a nyoloha, a re, “Uena Mora Davida, ako hauhele morali oa ka, hobane ke khafetsa a khathatsoa hampe ke liabolosi.”

¹⁶⁹ A retoloha a mo sheba, ha thoe, “Ha Kea lokela ho nka bohobe ba bana, ho bo lahlella lintja.” Shuu! Ana e ne e se taba? E ne e le eona! A se ke a mo latolela kopo ea hae feela, empa a mo bitsa “ntja.” Ke hantle. ’Me ntja ke le leng la mabitso a tlase a Bibele, u a tseba. Ka baka leo A re, “Ha Kea lokela ho nka bohobe ba bana, ho bo tsella lintja.”

¹⁷⁰ O itse, “U nèpile, Morena.” “Morena,” eaba o a e fumana. Ho eèna E ne e se Mora Davida ka letho, empa E ne e le Morena oa hae. Ho re, “Ka nèpo, Morena. Ke hantle, empa bana le bona ba ja makumane a tlas’... Kapa, ke re, e—e lintja le tsona li ja makumane a tlas’ tafole ea motlotlehi.” Keha e le eona. E ne e le eona. E ne e le hlompho eo.

¹⁷¹ Jesu a retolohela ho eèna, ho re, “Tumelo ea hao e kholo. Joale ikele lapeng, u tla fihlela morali oa hao a le kamoo u lumetseng.” Ke eona. Hobaneng? E ne e le katamelo ea hae.

¹⁷² Le re’ng hola a retoloha ’me a re... O ile a retoloha, ho re, “Hase tšoanelo ea Ka ho nka...” Ka mantsoe a mang, “Hase toka.”

¹⁷³ Ha re re, ho nyoloha Mokatolike ea re’ng, “Oh, Moena Branham, kea tseba Molimo o utloia lithapelo tsa hao bakeng sa batho bana mona. Na u tla nthapella?”

¹⁷⁴ 'Me ebe ke re, "Be, hase tšoanelo ho 'na ho senya nako ea bana bana holimo mona. Mona ke tlile ho rapella Mapentekosta, ha ea etsoetsoa lona mphi ea Makatolike." Ua bona? Ebe o ne a tla re'ng? Oh, monna, kea kholoa a ka be a tsoile mono a koebelaka joaleka eng le eng. Ua bona?

¹⁷⁵ Empa eaba o retoloha a re, "U nèpile, Morena. U nèpile, Morena. Empa re—re ikemiselitse joalo, lintja le tsona li ikemiselitse ho ja makumane a oetseng tlas'a tafole ea Motlotlehi."

¹⁷⁶ Ua bona, taba eo ebile ea Mo qhautsa ka potlako. A retoloha a re, "Tumelo ea hao e kholo." Hape re fumana taba e 'ngoe... Ua bona, e ne e le katamelo ea hae, hlompho ea hae. O ne a hlompha Molimo ha a ne a hlompha Eëna.

¹⁷⁷ Khetlo le leng re fumana Moroma, eëna e le monna ea phahameng, 'me a rata Bajuda. Eaba o kuleloa ke mohlanka oa hae. Eëna, o itemohile a sa tšoanelo ho ea kopa Jesu.

¹⁷⁸ Ua bona, u batla ho itemoha u le monyenyané ho feta seemo sa hao. Se leke ho iphamisa mahlong a hao. Ua bona? Joale, 'me haeba u le moholo, e re motho e mong a u bolelle eona. Ua bona? Empa joale ka nako ha uena, mosali enoa kapa...

¹⁷⁹ Monna enoa, ke rialo, o ipitsitse molaoli oa lekholo oa Moroma 'me a kuleloa ka mohlanka, eaba o romela hore mohlanka enoa ea kulang a folisoe. 'Me Jesu a re, "Ke tla tla mo folisa."

¹⁸⁰ Ka baka leo tseleng ea Hae, Moroma o Mo bone a e tla. Kea kholoa o itse, "Oh, khele, Ea Halalelang ke enoa o a tla. Ea Halalelang ke enoa o a tla. Be, 'na ke Molichaba ea sa baloeng. 'Na ke—ke—ke Moroma molaoli oa lekholo, ke mogenerale, kapa—kapa ofisiri. Ke—ke—ke—ke hlile ha ke Mojuda, ha ke na li tsoanelo tsa Monna ea Halalelang eo ea tlang." Na le bona hlompho? Ua bona? "Ha ke na tokelo ea ho tlisa Mohlanka ea Halalelang eo oa Molimo tlung ea ka."

¹⁸¹ Ho Mo bona a fihla monyako, 'me a Mo bitsa, ha thoe, "Morena, ke—ha ke na tokelo hore U ka kena tlasa marulelo a ka." Koana mohlomong a hahile paleise ea ntlu, molaoli oa lekholo. Ho re, "Ha ke na tokelo ea hore U kene tlas'a marulelo a ka. Le 'na—na ke itemohile ke sa tšoanelo ho tla ho Uena, ke rometse e mong oa batho ba Heno—Heno ka Sebele ba lehlohonolo, Bajuda. Empa mona ke kuleloa haholo ke mohlanka." 'Me a re, "Ke monna ea bolaoling," ho re, "ha ke laela lesole lena ke re, 'Tloha,' o a tloha. Ha ke lelaela enoa ke re, 'Tloo koano,' o a tla."

¹⁸² Ebe mono o itse'ng? "Ke U tseba o le matla ohle. U ka laela boloetse bona ua re, "Tloha," 'me bo a tloha. 'Me U ka boela ua laela hona, 'Tloo,' 'me e a tla.' Ua bona, o lemohile hoo. 'Me kamoo bolaoli ba hae bo laolang masole ana, Jesu le eëna bolaoli

ba hae bo laola maloetse ohle le mahloko. “Ntho e le ’ngoe eo U tlamehang ho e etsa, Morena, ke ho bua Lentsoe feela!” Ke eona! “Bua Lentsoe feela, mohlanka oa ka o tla phela.”

Jesu a ema, a retolohela ho Bajuda, ho re, “Le Iseraeleng ha ke eso fumane tumelo e kaalo.”

¹⁸³ A re, “Joale mohlanka oa hao o lutse hantle.” Amen. Hobane’ng? Hobane o e hlomphile. O hlomphile Jesu Kreste Eèena e beng e le e—e Molimo oa Leholimo.

¹⁸⁴ Joale, kea kholoa nako e a tsamaea. Ke sa batla ho bua ntho e ’ngoe hape, eona ke ena. Lihlompho tseo tsohle tse kholo, le lintho tse joalo; empa kajeno, ka mokhoa o itseng, ho fapane. Molimo a ka etsa ntho kajeno, ’me batho ba tla e tšeja. Kea kholoa re ka be re fapane kajeno, lilemong tse ka bang mashome a mane tse fetileng mohla Moea o Halalelang o ne o tšoloha la ho qala, empa batho ba etsa’ng? Ba koalla bareri, ba ba bitsa bahalaleli ba thetthehang. Re tsoile ra kena ho... Ba sa feptjoe le metseng, le ntho eohle ka mokhoa oo; ’me ba tula poone holim’ a liporo tsa terene, ho iphelisa. Ba ile ba etsa’ng? Ba ekelelitsoe lilemo tse ling tse mashome a mane, eona kereke, e ntse e sotleha, e fetile linthong tsohle, lintoa tse peli nakong e kaalo, ua bona, e bolaite like tsa bona; athe, mohlomong ekabe e se e iketse Lapeng.

¹⁸⁵ Joale, ho ka be ho etsahetse’ng, mohla Molimo o ne o qala o tšela Moea o Halalelang holim’ a kereke matsatsing a qetelo, ho ka be ho etsahetse’ng lilemo tse mashome a mabeli a metso e mehlano tse fetileng mohla A ne a qala a romela lipontšo le mehlolo ea Hae, ho ka be ho etsahetse’ng hola batho bohole ba e teela hare? Ba ile ba etsa’ng? Ba itse, “Ke boupelli, ke boloi, ke mobala-mohopolo, ke *sena, sane, kapa se sang*.” Hola lichaba tsohle tsa ema ngata e le ’ngoe tsa re, “Ho bokoe Lebitso la Morena”? Hola Mamethodise le Mabaptise, le Mapresbeteriene le bohole, hola ba teanya matsoho ’moho ba re, “Re leboha Molimo, esale re e shebeletse. Moea o Halalelang o a tšoalloa. Khele, banna ke bana ba bona lipono, baporofeta ke bana har’ a röna, mona ho—mona ho fumanoa lineo tsena tsohle tse kholo tsa mefuta, ba buang ka lipuo, bafolisi ba Khalalelo ke bana, mona ntho eohle e tšeloa holim’ a röna. Ho bokoe Molimo, e tlide ka sehlotsoana se ithobileng se bitsoang Mapentekosta. Ha re khutleleng bohole Bibeleng. Ha re khutleng, baena, re pshatle mekhatlo ea röna, ’me bohole re be moena a le mong”? Hola likereke tsohle tse kholo tsa teana ’moho, ho ka etsahala’ng? Moena, ho ne ho sa tl’o hlokoa le sepatala se le seng naheng kajeno. Ke hantle. Che, ho ne ho tla hlaha lineo tse kholo tse matla hakana le mehlolo e sebetsang har’ a batho, ho be le hlompho e kana, ’me mohlomong kereke ekabe e le khale e ile Lapeng ’me ho kene Lilemo tse Sekete.

¹⁸⁶ Empa, che, ba e hlompholotse. Ba ba bitsitse bahalaleli ba thetthehang. Maseli a litaba a emela ho bua ntho e nyelisang, e litšila ea bokhoni ba bona, le ho leka ho e phara ka hlapa ea bokhoni ba bona, le lintho tse kang tseo, 'me likereke tsa hihitsa li e tšeħa, le—le ho ba soma, le ho ba leleka le ho leka ho ba thibela ho kena metseng, le ntho e 'ngoe esele, ka hlomphollo. Joale, nka bua tse ngata ka taba eo, empa nako ea tsamaea.

¹⁸⁷ Ha nke ke etele Tabernakele ea Branham, hlen. Joale Molimo o qala a tšela lineo holim'a rōna. Rea e bona. Joale, ebe neo ea Molimo ke efe kajeno? Ke Moea o Halalelang, Ke Moea o Mokhethoa ka ho rōna. Re loketse ho hlompha Hoo. Re loketse ho O hlompha holim'a mang le mang eo O theohelang ho eēna. Re loketse ho re-... ho fa... nqa lineo tsa Molimo tse Khethehileng. Ha A romela lineo tseo, ho sa tsottelehe hore ke tsa sebele hakae, e ke ke ea re thusa hofihlela re fihlilele moo re e hlomphileng. Motha a ka ntša seporofeto; ha u sa lumele seporofeto seo, se ke ke sa u thusa ka letho. U loketse ho apara tšabo le ho se hlompha. U loketse ho lumela hoba se tsoa ho Molimo.

¹⁸⁸ Se lumele hofihlela se pakoa se le phoso. Mohla se pakoang se le phoso, u na le tokelo ea ho se se lumele, u se hhole u ikamahanya le sona. Empa ha feela se pakoa e le 'nête, u se lumele.

¹⁸⁹ Joaloka Samuele oa khale ea buileng mohla ba batlang morena. O itse, "Ke batla ho le botsa taba. Na nkile ka le nkela chelete ea lona? Na nkile ka qella ho phela ha ka ho lona? Kapa, na nkile ka le bolella taba e sa hlahang ka Lebitso la Morena?" A re, "Ha le hloke morena oa letho, ebile morena oa lona a ke ke a le thusa ka letho." 'Me o ba boleletse. A ba botsa potso, ho re, "Na nkile ka le bolella taba e leng HO RIALO MORENA haese e hlahileng?"

¹⁹⁰ Joale, eaba batho ba hlompholla Samuele. "Oh, rea tseba, Samuele. Ke hantle, uena, re ke ke ra re u re boleletse letho... se ne se nèpile, empa, empa leha ho le joalo re batla ho e sebetsa ka tsela *ena*." Ua bona? Ha u a tšoanelo ho etsa joalo. U tšoanelo ho e sebetsa ka tsela ea Molimo.

¹⁹¹ Ha re amohela Moea o Halalelang, hase ho tsukutla matsoho le moruti. Ho amohela Moea o Halalelang ke ho amohela Kreste ka ho uena, hoba e le Eēna Lenqosa la Molimo la letsatsi. Moea o Halalelang ke Lenqosa la Molimo, 'me re tšoanelo ho Mo hlompha. Ha A fihla, u se ke ua re, "Hee! Hee! Hee! Sheba mosali eane ea hooeletsang mane, 'me a lla, likeleli li qhitsa marameng a hae. Sheba monna eane mane, ea reketlang matsoho a bile a thothomela 'me a lla. Lea tseba hoo ke'ng? Ke maikutlo a mangata feela a fehluoeng." U ntse u nyefola Moea o Halalelang. U loketse ho hlompha Hoo.

¹⁹² Ho hopola, nakoana e fetileng mona ha ke etetse koana Oregon, koana, ekaba lilemo tse leshome le metso e 'meli tse fetileng. 'Me eaba ho theoha banana ba babeli ba Makatolike

e le baqolotsi ba litaba. Hase ka hobane e ne e le Makatolike, le ho leka; hoba ke fumane Maprotestanta a makaalo, le Maprotestanta a mangata ho feta Makatolike, a ntšomileng. 'Me—me—'me eaba banana bana ba theoha ho hlahisa tlaleho. Hang hoba ba kene ka mono, ka qhautsa moea hang hoba ba kene, 'me ka re, "Ho lokile, joale ebe le koetlile nyatso efe?" Eaba ngoanana enoa o hotolla sikarete 'me a qala, 'me ka re, "U se ke ua se chesa u sa le ka motlotloaneng oa ka. Ako se tlohele."

¹⁹³ Ka hona ho lula mono nakoana, a ncheba eka a ka nketola, ka mokhoa oo, eaba o qala a bua le 'na. A re, "Be, ke batla ho u botsa lipotso tse 'maloa."

Ka re, "Qhoba."

¹⁹⁴ A re, "Ha tla joang hore u ikamahanye le sehlopha sena sa bathethehi ba halalelang holimo mona?" Ha thoe, "Na u e mong oa bona?"

Ka re, "Ke e mong oa bona."

¹⁹⁵ 'Me eaba o re, "Be, u re ho ka ba le bolumeli ba letho nthong e kang eo?"

Ka re, "E seng ho uena, joaloka Mokatolike, le ke ke la e lumela."

A re, "Ua ntseba ka'ng hore ke Mokatolike?"

¹⁹⁶ Ka re, "Kea u tseba u Mokatolike. Ke tla u bolella lebitso la hao, ua bona, le hore u mang." Taba eo ea hla ea 'malehisa moriri hle.

¹⁹⁷ A re, "Be, u mpolella hore batho ba mofuta oo, ba re, ba tla phela mona lefatšeng 'me ba ahe Leholimong?" A re, "Nke ke ka batla ho ba Leholimong le batho ba mofuta oo."

¹⁹⁸ Ka re, "Ha u a tlameha ho tšoenyeha hakaalo. Ha feela u nahana ka mokhoa oo, u ke ke ua ba teng mono mono, le hona, ua bona." Ka re, "U ke ke ua tlameha ho tšoenyeha ka letho la hoo."

¹⁹⁹ Ka ema feela, ka mo sheba sefahlehong hantle. 'Me keha e—e baena ba 'maloa ba lutse ka mohahong. Ka re, "Ha ke hlophe. Ke—ke mpa ke batla ho u bolella moo u emeng teng, ua bona." 'Me ka re, "U tli'o ngola, u batlile koano ho fumana lintho tse itseng, 'me u ke ke ua ngola seo ke u boleletseng sona. U tla iketsetsa pale ea hao. U ka tsoela pele ua etsa hoo, empa ke batla ho u bolella ntho e le 'ngoe. U ka ngola sesomo sefe seo u se batlang, 'me" ka re, "pele u eshoa, lentsoe la ka le tla tiletsa litsebeng tsa hao. Ha le sa etse joalo, u tla tseba hore ke moporofeta oa bohata." Ka re, "Joale, u ka ngola eng le eng eo u e batlang, ho ho uena. Ke u lokolla ho ngola seo u se batlang. Empa pele u eshoa, u tla utloa lentsoe la ka le hooeletsa litsebeng tsa hao. E ke ke ea u thusa ka letho." Ka re, "Joale u ka tsoelapele 'me u ngole seo u se batlang."

²⁰⁰ A ema mono nakoana. A re, “Be, u nahana’ng ka sehlopha seo sa mahlanya holimo mono, se neng se hloliea ’me se itsoere joalo maobane bosiu?”

Ka re, “Ke Bakreste kaofela.”

“Mokreste?”

²⁰¹ Ka re, “Ehlile, ke Bakreste.” Ka re, “Ke Bakreste, ba tletseng Moea o Halalelang.”

’Me a re, “Ntho eo hase Moea o Halalelang.”

²⁰² Ka re, “Ebe Moea o Halalelang u a ka bitsa’ng?” Ho bona seo a tlang ho se bua ka eona. Ka re, “Ke rata ho u bolella taba.”

²⁰³ A re, “Be, nke ke ka batla ho iketsa setlama le sekhakhatha se joalo.”

²⁰⁴ Ka re, “Ha ke khloeo hore kotsi e kholo e teng,” ka re, “ea ho iketsa setlama ka mokhoa oo.” Ka re, “Hobane, haeba u ka iketsa setlama le Molimo kapa le bahalaleli bafe, u tla iketsa setlama ka mokhoa oo.”

A re, “Bahalaleli ba Bibele?”

²⁰⁵ Ka re, “E.” Ka rialo, “Ua lona ‘movirigo Maria ea lehlohonolo,’ le ’mitsa joalo, ke molimotsana oa lona,” ka re, “le pele Molimo a mo lumella ho tla Lehlimong, o ne a tlamehe ho nyolohela Letsatsing la Pentekosta le ho amohela Moea o Halalelang, le ho thekesela tlas’a Matla a Molimo joaleka mosali ea tahiloeng.”

A re, “Ke leshano.”

²⁰⁶ Ka re, “Thola motsotso feela.” Ka phetla Buka mona, ’me ka re, “Sheba mona,” ho phetla. Ka re, “Ke ena mona e kahara Buka hantle.” ’Me eaba o thintša hlooho ea hae. Ka re, “Ha u na le sebete sa ho bala Lentsoe la Molimo.” Ua bona? Ka re, “Ehlile.” Ua bona, ho hloka hlompho. Ka re, “Joale u ka tlosa pakana ea hao ea sikarete holim’ a tafole mono, ’me ua tsamaea ha u lokile.” Empa ka re, “Ke batla hore u tsebe ntho e le ’ngoe. U ka ngola seo u se batlang, empa u hopole mantsoe a ka a ho qetela ao ke a buang, ‘Ka Lebitso la Morena, pele u eshoa u tla e hopola.’” Ha a ka a ngola letho. Ke hantle. O ile a e tlohela feela.

²⁰⁷ Ke eng? Ho hloka hlompho, ho leka ho soma, ho etsa ntho e ’ngoe. Ha ba tsebe seo ba se etsang. Ke hantle.

²⁰⁸ Empa mona kahara tabernakele, bohole re le batla le tsebile lintho tsena mona. Molimo ha o qala o tšela Moea o Halalelang holim’ a batho, ka linako tse ling kea tseba ke bone batho ba kenang nameng ba sa le—ba sa le tlas’ a tlolo ea Moea, ke ba bone ba feteletsa lintho, empa se bue letho ka eona. U e hlomphe, inamisa hlooho ea hao. Mohlomong ha u e utloisise, le ’na nke ke, empa ke batla ho e hlompha, leha ho le joalo. Joale, re loketse ho hlompha Molimo. ’Me ha Molimo o tšela

Moea o Halalelang, ke leboha feela, ho re, "Kea U leboha, Ntate ea Lehelimong. U ntse u etsetsa moea oo oa batho o thekothata o batlang ho tla Lapeng la Hao ntho e 'ngoe, joaloka 'na, tsatsi le leng."

²⁰⁹ 'Me ke bona banna, joaloka moena ea tšebetsong ea lentsoe a itse ke buile ka eèna mona nakoana e 'ngoe. 'Me eaba re tloha re ea bokella liteipi ra mo romella tsona. E ne e le Moena A. A. Allen. 'Me a itse ke mo somme ke bua ka mali a kopotsang letsohong la hao le—le ho e bitsa pontšo ea matlha ea Moea o Halalelang, 'me—'me kea kholoa e ne e le mali le oli e kopotsang matsohong a hae le phatleng, le lintho tseo. O itse ke sona—sona seo ke sommeng ka sona ka 'molella e ne e le ea liabolosi. Ka boela ka romela, ka mo ngolla lengolo, ka re, "Moena Allen..." O ngotse seratsoana 'me le—le se balile, "Moena Branham ea ratehang." Ua bona? Le ho phatlalatsa lipampitsana naha bophara, sebakeng sa ho tla mpona ka eona, o entse hoo.

²¹⁰ Empa seo ke se buileng ke sena, ke itse, "Ke tla qeta masiu ohle a tšeletseng Phoenix, 'me ke u romelle liteipi tsa ka ke u bontše." Eaba Leo le bao ba etsa joalo, ho ba romella liteipi. Ka re, "Ketlo la pela moo lebitso la hao le kileng la bitsoa. Ke mohla batho ba e beileng desekeng ea ka, ha thoe, 'Moena Branham, Moena Allen o sa tsoa tloha motseng 'me o itse ho rôna "pontšo ea mantlha ea Moea o Halalelang e ne e le ho fopha mali matsohong le ho fopha mali sefahlehong, le oli e phallang e kopotsa letsohong la hao, e ne e le pontšo ea mantlha eo.''''

²¹¹ Ka re, "Ha ke lumelane le Moena Allen ha ho thoe boo ke bopaki ba mantlha ba Moea o Halalelang, hoba ho se moo ba kileng ba kopotsa mali matsohong kahara Bibele, le—le oli e kopotsa sefahlehong sa bona le matsohong, ho ba paka ba ena le Moea o Halalelang." Ka re, "Moea o Halalelang e ne e le Matla a Molimo maphelong a bona. 'Me Jesu o itse, 'Mehlolo e tla tsamaea le ba lumelang ke eona ena,' ua bona. 'Ka Lebitso la Ka ba tla leleka batemona,' le intho tse joalo." Empa ka re, "Ntho e le 'ngoe eo nka e buang ka Moena Allen, ke monna e moholo oa Molimo. 'Me ha nka rera hantle joaloka Moena Allen, nke ke ka tšoara tšebeletso ea pholiso, ke ne ke tla rera Evangelie feela."

²¹² Hape, ua bona, ka mora ho phatlalatsa pampiri eo le ntho eohle, ho thoe ke "entse hoo," feela ka taba e builoeng ke motho e mong. Empa leha koana ke hanane le moena ka mohopoloo oa hae, ruri nke ke ka batla ho nyefola moena.

²¹³ Hape le ho ema hantle mono, holimo mono Minnesota, bosiung boo, koana Minneapolis, Minnesota, 'me kahara khathederale e kholo eo, tempele, Gordon Peterson a le teng. Homme thaka lena le ngotseng buka khahlano le A. A. Allen, ho bua ntho eohle e ka buuoang ka eèna, le ho re, "Esitile a le sebete sa ho ngola buka eo ea *Boliabolosi Ba Lomang*, mabapi le mosali eo, ea bontšitseng likhatiso matsohong a hae moo liabolosi a mo

lommeng, le lintho tse joalo.” Joale ke—ke ruri . . . (Ha ke tsebe na hoo ke ’nete kapa che, kaha liabolosi ke moea, lea bona; empa mosali enoa o itse liabolosi oa motonana ea mohoete o mo lomme matsohong le hohle sefahlehong, le ntho eohle ka mokhoa oo.) ‘Me a re, “A. A. Allen o ngotse buka eo.” Athe monna ea ngotseng buka eo, o ngotse seratsoana se monate ka ’na, ’me e le enoa a lutse kahara kopano mono bosiung boo (eitseha Moena Peterson le bao ba tla mpolella, keha a lutse mono), ’me a iphafa ka ’na, athe a nyatsa A. A. Allen.

Ka nahana, “Monyetla oa ka oa ho emela Moena Allen ke ona.”

²¹⁴ Eaba ke tsoa mono, ka re, “Mona ke sa tsoa bala seratsoana pampiring kajeno ho thoe monna enoa ea kahara motse, ha se . . .” Ke ne ke tseba hore o lutse kantle mono. Ka re, “Mona o buile ka A. A. Allen, le ka litšehollo tsohle.” Ka re, “Leha koana ke ananèla monna ea nthoholetsang kamoo a entseng kateng,” ka re, “ho thoe ha ke kamora chelete le lintho tse joalo, ’me ke tšoara tšebeletso e hloekileng ho feta tsohle, le lintho tse joalo, o buile lintho tse hlabsang.” Ka re, “Ke ananèla seo. Empa monna ea ngotseng seratsoana seo mona pampiring, haeba a sa hlahloba seratsoana sa hae ka hloko e fetang eo a re A. A. Allen o ngotse *Boliabolosi Ba Lomang*. Ha se A. A. Allen ea ngotseng buka eo. Ke tseba monna ea e ngotseng.” Ka re, “Ha a ngola buka ea letho. ’Me haeba monna eo a sa hlahloba seratsoana sa hae ka hloko e fetang eo, kea belaela hore sohle seo a se buileng ka Moena Allen se nèpahetse.” E le ha ke emela Moena Allen. ’Me ka re, “Ntle le moo, haeba Moena Allen a fèla a fositse, koana Setulong sa Kahlolo nka mpa ka fumanoa ke emela Moena Allen ea phoso, holim’ a a leka ho hapela Kreste meeä, ho ena le ho nyatsa seo monna eo a lekang ho se etsa.” Amen. Ke hantle. E, monghali.

²¹⁵ Mang le mang ea bitsang Lebitso la Jesu Kreste, ke ema le eëna le haeba e le Moprotstanta, Mokatolike, kapa e ka ba eng. Nka—nka hanana le eëna ka thutamolimo, empa ke batla ho mo hlompha joaleka mohlanka oa Kreste le joaleka moena oa ka. Ua bona? ’Me ho sa tsottelehe seo a se etsang, re loketse ho hlompha Moea o Halalelang. Hantle haholo. E, monghali. ’Me ha re tsa hono, Molimo o tla re tšella mahlohonolo a Hae har’ a röna. Feela röna, sehlotsaana se leng mona hantle, e ka ba mashome a mahlano kapa mashome a tšeletseng, kapa ka mona bosiung bona ho lutse batho ba ka etsang mashome a supileng a metso e mehlano, hola feela re ka khona, hammoho, ra itlama ngata e le ’ngoe ’me lebisa ho Molimo le ho Moea o Halalelang hlompho ea bomolimo, le ho seo A se etsang letsatsing lena, le ho hlompha neo ka ’ngoe le ofisi ka ’ngoe eo A e romang har’ a röna, Molimo o tla tsoella feela ho tšela Moea oa Hae holim’ a röna le ho atolosa lipalo tsa röna ’me re ngatafale. Na ha le e lumele? Ehlide. Re loketse ho isa hlompho ho Molimo.

²¹⁶ Ha re inamiseng lihlooho tsa rōna nakoana thapelong. Pele re fetela thapelong, ke rata ho tseba haeba ka mona motho a le teng ea ka ratang ho re, "Moena Branham, ke batla u nthapelle, hore ke tle ke hlomphe Molimo haholo, ke tle ke khone ho koala molomo oa ka kamehla khahlano le lintho tsa Molimo, e ka bang eng, 'me Molimo o ke o kenyē pelōng ea ka lihlompho nqa neo e 'ngoe le e 'ngoe e Mokhethoa eo A e romelang kahara kereke." Na u ka phahamisa matsoho a hao, le ho re, "Nthapelle." Molimo a le hlohonolofatse. E batla e le letsoho ka leng kahara kereke, le la ka le phahame, le 'na.

²¹⁷ Molimo, nthuse ho ba mohlanka oa Hao. Nthuse ho hlompha baena ba ka, nthuse ho hlompha likhaiseli tsa ka. 'Me Moea o mong le o mong oa Molimo o kenang kopanong, e ka bang ho bua ka lipuo, e ka bang koahollo ea lipuo, e ka bang boporfeta, e ka bang lineo tsa temoho ea moea, e ka bang eng, ke re, "Oho Morena Jesu, li romele. Li romele, oho Morena. Ke U leboha haholo."

²¹⁸ Joale, Ntate oa Leholimo, re U tseba u le Molimo o moholo le o tšabehang. Rea tseba hobane khalefo ea Hao e a tšabeha. Ha U ka phahamisa bohale ba Hao, khele, ke—ke ntho e tšabehang. Khalefo ea Molimo e ka timetsa lefatše ka motsotsoana. Empa hang ha U nyarela fatše ka Mali a Morena Jesu, khalefo ea Hao e a faposoa. Oh, ako mpate koana kahara Lefika la Mengoaha! Morena Molimo, ako baballe moea oa ka o khurumelitsoe ke Mali a Morena Jesu. E seng oa ka ke inotši, Morena, empa bao ba kahare ka mona, le bona, bosuing bona. Rea U rata, Morena. 'Me neo e 'ngoe le e 'ngoe eo U re neileng eona, leha ba ka re bitsa sohle seo ba batlang ho se etsa, Morena, hoo ho sa ntse ho sa . . . ho se batle ha se amana le eona ka letho, re sa ntse re U hlompha, Uena e moholo, Moea o Halalelang o moholo. Rea U rata, Ntate.

²¹⁹ Re U leboha ka neo ea pholiso har'a rōna. Re U leboha ka neo ea boporfeta har'a rōna. Re U leboha ka neo ea lipuo, le ka neo ea phetolelo. 'Me, oho Molimo, re U rapela ho 'na u romela lineo har'a rōna, lineo tsa Moea o Halalelang o moholo. Holim'a lintho tsohle, Morena, kananelo ea rōna e kholohali pelōng ea rōna ke ka baka la Neo eo e tletseng bokhoni-bohle, ea Jesu Kreste. Re U leboha ka mohau oa Hae le lereko la Hae, e leng Eèna ea re neang linthoana tse ling tsena tse nyenyane ka ho Ipelesa mahlomola le ka ho fopha mali ha Hae mane Kalvari. Ke eèna ea halaletsang batho ba tlase ba Mo utloang ka thabo.

²²⁰ 'Me, Morena, re thabetse ha U etetse batho ba tlase. Kahara Bibebe, Bukeng ea Mohalaleli Luka, re balile hoo, "Batho ba tlase ba Mo utloile ka thabo." Kajeno ba re, "Oh, bao ke sehlopha sa maemo a tlase." Empa, Morena, ke sona sehlopha se U utloileng mohla U ne u le mona ka nama. Ke batho ba tlase ba U utloileng ka thabo. Baikakasi, barui,

le bangata bao ha ba ka ba U utloa. Marena, le babusi, le baprista ba letsatsi, ba hanne ho U utloa. Empa batho ba tlase ba U amohetse ka thabo.

²²¹ 'Me, Ntate, bosius bona, re batho ba tlase, 'me re U amohela ka thabo. Re thabile joaleka bao ba khutlileng ba nyakaletse, 'me ba hopola e le ntho e babatsehang, 'me ba thabile kahobane ba khonne ho jara sekhobo sa Lebitso la Hae, mohla ba ba sommeng ba ba bitsa ntho eohle. 'Me keha ba thabile haholo, kaha ba fuoe monyetla oa ho utloa bohloko bakeng sa Lebitso la Jesu Kreste. Ntate, Molimo, re iketsa setlama se le seng le barutua ba letsatsi leo, 'me re re, "Rōna re thabile."

²²² Bosius bona ke ema joaleka Mohalaleli Pauluse oa khale, mohla a emeng ka pel'a Agrippa, 'me a re, "Ka Mokhoa o bitsoang bohlanya, ho hlannya, ke kamoo ke sebeletsang Molimo oa bontata rōna."

²²³ 'Me eitseha Agrippa a re, "Pauluse, u fetotsoe lehlanya ke thuto e ngata."

A re, "Ha ke hlanye, oho Agrippa."

²²⁴ 'Me qetellong a fihla sebakeng, moo a itseng, "U qophella ho ba Mokreste."

²²⁵ A re, "Nka rata hoba u be joaleka 'na, feela e se ka mahlaahlela ana a litlamo."

²²⁶ Oho Molimo, lerato la Pauluse le ne le le kakang, o itse a ka fetoha thohako, hore batho ba ha'bo ba tle ba bolokehe. Oho Ntate, Molimo, re fe ho ratana ka mokhoa oo. Re fe lerato leo le sa shoeng, hloeko eo, hlomphano eo, ho fetoha Mokreste ea ka tlolisang liphoso tsa ba bang mahlo, ho iphapanya eona. Hobane monna a ka hlohonolofatsoa ke Molimo; 'me a ka etsa phoso. Oho Ntate, re se shebe phoso eo, ho tseba Satane mohlomong a chehetse moena ea khabane eo leraba. Empa haeba a e entse, rea rapela, Morena, hore U tle u thusé ho ntša monna eo kapa mosali sekutlong seo, re tle re be lerato lipelōng tsa rōna ho sala nku e lahlehileng eo morao le ho e khutlisetsa mohlapeng. Aba sena, Morena. Re tšoarele littolo tsa rōna, joalekaha le rōna re tšoarela ba re siteloang. Aba sena, Morena. U se ke ua re isa molekong, u mpe u re loele bobeng. Hobane 'muso ke oa Hao, le matla, le khanya, kamehla. Amen.

[Moena Neville o fana ka molaetsa oa boporfeta—Mong.]

²²⁷ Amen. Amen. Amen. Kea U leboha, Morena. Kea U leboha, Ntate. Ho rorisoe Uena, oho Uena Mohalaleli. U tlotlehile hakakang, Ntate! Re U leboha hakakang, Morena! Ke tšeliso e kakang ho utloa Boteng ba Moea o Halalelang le ho Mo utloa a bua ka lipounama tsa motho, ho rōna, ho népahatsa hore E sa le Molimo, 'me o har'a rōna. Re U leboha ka sena, Ntate. Tsoelapele le rōna, Morena. Ako re mamelle, re tle re be batho ba Hao. Ka Lebitso la Jesu Kreste rea e kopa. Amen.

²²⁸ Na ha ho babatsehe ho ba Mokreste? Na ha ho babatsehe ho tseba Molimo le ho tseba Boteng ba Hae? Ho nahana hore kajeno, joale, kamoo A e entseng khetlo la bobeli. Kajeno O—O buile le khaitseli mona, ho kena, ka Leseli leo kamoo A entseng kateng, le ho bua le bona kahobane ba lumetse Molaetsa. O tlottlehile, ha A joalo na? Ha le Mo rate na? Ba Mo ratang ka pelō ea lona eohle ba bakae, ka moea oa lona ohle? O a babatseha. Joale ha re emeng ka maoto a rōna, re sa bina sefela se monate seo sa khale seo re se ratang.

Kea Mo rata, kea Mo rata
Hoba A nthatile pele
Le ho lefella poloko ea ka
Fateng sa Kalvari.

²²⁹ Oh, na ha A babatsehe? Ho a babatseha! Joale, le hopole tšebeletso ea Laboraro bosiu. 'Me hape, ha Morena a ratile, ke tla fihla mona Sontaha se tlang, ha Morena a ratile. Le re rapelle tsamaong ea veke. Re sa inamisa lihlooho tsa rōna joale thapelong, ke tlil'o kopa Moena Neville, moruti oa rōna, haeba a ka nyoloha ho le hlahietsa mantsoe a hae a qetelo.



HLOMPHO SST61-1015E
(Respects)

Molaetsa wona, ka Moena William Marrion Branham, o rerilwe sethatong ka Senyesemane ka Sontaha mantsiboea, Mphalane 15, 1961, mane Tabernakale ea Branham, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org